

卷

上

封域

城市

戶口

坊市

物產

風俗

門名

學校

州宅

南園

倉務

海道

亭館

牧守

人物

卷

中

橋梁

祠廟

宮觀

寺院

山水

吳郡圖經續記

薇生題籤

吳郡圖經續記序

方志之學先儒所重故朱贛風俗之條顧野王  
輿地之記賈耽十道之錄稱於前史蓋聖賢不  
出戶知天下矧居是邦而可惜於古今哉按唐  
六典職方氏掌天下之地圖凡地圖命郡府三  
年一造與版籍偕上省

聖朝因之有閏年之制蓋城邑有

損益戶口有登降不可以不察也吳

圖志相傳固久自大中祥符中

詔修圖經每州命官編輯而上其詳略蓋繫乎其人而諸公刊修者立類例据所錄而刪撮之也夫舉天下之經而修定之其文不得不簡故陳述異聞難於具載由祥符至今逾七十年矣其間近事未有紀述也元豐初朝請大夫臨淄晏公出守是邦公乃故相國元獻公之子好古博學世濟其美嘗顧敞廬語長文曰吳中遺事與古今文章湮落不收今欲綴緝而吾所善練定以謂唯子能爲之也長文自念屏迹陋巷

未嘗出庭戶於求訪爲艱而練君道晏公意屢見趣勉於是參考載籍探摭舊聞作圖經續記三卷凡圖經已備者不錄素所未知則闕如也會晏公罷郡乃藏于家今太守朝議大夫武寧章公治郡三年以政最被命再任比因臨長文所居謂曰聞子嘗爲圖經續記矣予願觀焉於是稍加潤飾繕寫以獻寘諸郡府用備諮閱固可以質凝滯根利病資議論不爲虛語也方

聖上睿謨神烈

聲教光被海隅出日固不率俾  
廣地開境增為郡縣倘或

申命方州更定圖籍則此書廢幾有取也事有  
缺略猶當刊補其古今文章別為吳門總集云  
元豐七年九月十五日州民前許州司戶參軍  
朱長文上

雍正十二年甲寅孟夏三日校吳郡

杏林坊文瑞樓藏宋刻本一次

吳郡圖經續記卷上

朱長文


封城 城邑 戶口 坊

風俗 門名 學校 州宅

倉務 海道 亭館 牧守 人物

封城

蘇州在禹貢為揚州之域書云三江既入震澤  
底定即此地也至周為吳國始泰伯與其弟仲  
雍皆太王之子王季歷之兄也泰伯以天下遜



其弟王季乃與仲雍南奔以避之卽其所居自號勾吳吳民義而從之者千餘家當商之末世築城郭以自衛遂爲吳泰伯春秋傳曰泰伯端委以治周禮仲雍嗣之自泰伯作吳五世而武王克商求泰伯仲雍之後得周章周章已君吳因而封之其爵爲伯國語云命圭有命固曰吳伯不曰吳王自周章傳十四世吳子壽夢立吳益大稱王而春秋書之曰子魯成公七年春吳伐郟秋吳入州來是時楚一歲七奔命蠻夷屬

於楚者吳盡取之始通於上國矣又更四君至吳王闔廬吳自泰伯以來所都謂之吳城在梅里平墟乃今無錫縣境及闔廬立乃徙都卽今之州城是也於是西破楚入郢北威齊晉蓋當是時吳與越以浙江分境越患猶遠吳越春秋云勾踐五年入臣於吳羣臣祖道至浙江上蓋浙爲吳境也勾踐七年旣釋囚返國厚獻吳王夫差夫差悅之於是賜書增之以封東至句甬西至檣李南至姑末北至平原縱橫八百餘里

子胥諫之不聽

事具吳越春秋

吳之南境益狹矣勾踐

終敗吳而圍之魯哀公二十二年越滅吳吳廼

為越而越王未聞居吳也勾踐後更六王至無

疆更一百四十餘年為楚威王所滅取吳故地

威王曾孫曰考烈王春申君黃歇為之相乃以

吳封春申使其子為假君留吳及秦併其地置

會稽郡漢順帝永建四年分會稽為吳郡以淞

江中流為界晉宋齊梁陳之間雖頗割地而郡

不改與吳興丹陽號為三吳隋平陳割鹽官以

隸于杭至唐有吳長洲嘉興崑山常熟海鹽華

亭七邑號為雄郡乾元二年嘗置長洲軍大曆

中廢五代時分嘉興海鹽華亭別為秀州隸蘇

者唯五縣錢氏獻其籍

國朝以為平江節度所領縣仍故謂之望郡云

### 城邑

昔闔廬問於子胥曰吾國在東南僻遠之地險

阻潤濕有江海之害內無守禦外無所依倉庫

不設田疇不墾為之柰何於是子胥說以立城

郭設守備實倉廩治兵庫

一作革

闔廬乃委計於

子胥使之相土嘗水象天法地築大城周四十

里小城周十里開八門以象八風是時周恭王

之六年也自吳亡至今僅二千載更歷秦漢隋

唐之間其城域門名循而不變陸機詩云閶門

何峨峨飛閣跨通波其物象猶存焉隋開皇九

年平陳之後江左遭亂十一年楊素帥師平之

以蘇城嘗被圍非設險之地奏徙於古城西南

橫山之東黃山之下唐武德末復其舊蓋知地

勢之不可遷也觀於城中衆流貫州吐吸震澤

小濱別派旁夾路衢蓋不如是無以泄積潦安

居民也故雖名澤國而城中未嘗有墊溺蕩析

之患非智者創於前能者踵於後安能致此哉

而流俗或傳吳之故都在館娃宮側非也蓋娃

宮胥臺乃離宮別館耳當吳之盛時高自矜侈

籠西山以爲園度五湖以爲池不足充其欲也

故傳闔廬秋冬治城中春夏治城外旦食鉏山

晝遊蘇臺射於鷗陂馳於遊臺興樂石城走犬

宋刻有

宋后

流

長洲其耽樂之所多矣左氏傳載楚子西之言曰夫差次有臺榭陂池焉宿有妃嬪嬪御焉一日之行所欲必成今故老猶能道其遺跡信不虛也自唐季盜起浙西帥周寶以楊茂實為刺史為盜所據龍紀元年錢鏐遣其弟鉞破徐約於此州以都將沈粲權領其後李宥一作孫儒楊行密時臺濠三陷郡城乾寧五年鏐既平董昌遣其將顧全武自會稽航海道帥師擊之臺濠遁去蓋於此十餘年間民困于兵火焚掠赤

地唐世遺跡殆盡錢氏有吳越稍免干戈之患自乾寧至於太平興國三年錢俶納土凡七十八年自錢俶納土至于今元豐七年百有七年矣當此百年之間井邑之富過於唐世郭郭填溢樓閣相望飛杠如虹櫛比棊布近郊隘巷悉甃以甃冠蓋之多人物之盛為東南冠實太平盛事也

### 戶口

西漢之會稽郡舉今二浙之地皆在焉其為戶



二十二萬三千三十八東漢之吳郡舉今浙西之地皆在焉其爲戶十六萬四千一百六十四晉之吳郡舉今杭秀睦三州之境皆在焉其爲戶二萬五千唐之蘇州舉今秀州之地在焉初其爲戶一萬一千八百五十九天寶之盛至七萬六千四百二十一自錢武肅分蘇以爲秀州用自屏蔽其隸蘇者吳長洲崑山常熟又分吳縣爲吳江合五邑而已忠懿王以其國歸之有司

國朝與民休息稼穡豐殖大中祥符四年有戶六萬六千一百三十九由祥符至于今七十餘年間累聖丕承仁澤日厚龐鴻汪洋何生不育元豐三年有戶一十九萬九千八百九十二有丁三十七萬九千四百八十七嗚呼盛矣蓋此州在漢廼一縣之境比唐爲半郡之餘而其民倍僣於當時不可勝數蓋自昔未有今日之盛也故其輸帛爲疋者八萬輸纊爲兩者二萬五千輸苗爲斛者三十四萬九千

苗有蠲放者在此數中

輸

棺宋刻  
權同

錢免役爲縉者八萬五千皆有畸數畸殘也焉而  
又有鹽稅推酤之利爲多以一郡觀之則天下  
蓋可知矣昔冉有曰旣廢矣又何加焉孔子曰  
富之旣富矣又何加焉曰教之苟有用我者期  
月而已三年有成況今承百年太平之後而有  
四海全盛之勢哉方

聖上精一以迪德幾微以成務講政修教朝出  
於軒陛暮行於海宇六府三事旣允治矣方當  
節之以禮和之以樂躋民於堯舜三代之隆此

其時哉

### 坊市

圖經坊市之名各三十蓋傳之遠矣如曳練坊  
者或傳孔子登泰山東望吳閭門嘆曰吳門有  
白馬如練因是立名黃鸚市之名見白公詩所  
謂黃鸚巷口鸞欲語烏鵲橋頭冰未銷是也其  
餘皆有義訓不能悉知其由其巷名見於載籍  
者如彈鋏渴烏一二種皆莫知其處乃知事物  
不著於文字之間則艱於傳遠故方志之說不

可廢也近者坊市之名多失標榜民不復稱或有因事以立名者如靈芝坊因樞密直學士蔣公堂師道豸冠坊因侍御史范公師道德慶坊因今太子賓客盧公革各以其所居得名蓋古者以德名鄉之義也苟擇其舊號益以新稱分其邑里因以彰善旌淑不亦美哉昔梅福弃官易名姓爲吳市門卒今此有西市門殆其所隱乎

物產

吳中地沃而物夥其原隰之所育湖海之所出不可得而殫名也其稼則刈麥種禾一歲再熟稻有早晚其名品甚繁農民隨其力之所及擇其土之所宜以次種焉惟號箭子者爲最歲供京師其果則黃柑香碩郡以充貢橘分丹綠梨重絲帶函列羅生何珍不有其草則藥品之所錄離騷之所詠布護於皋澤之間海苔可食山蕨可掇幽蘭國香近出山谷人多玩焉其竹則大如簣簾小如箭桂含露而班冒霜而紫修篁叢筍森萃蕭瑟高可拂雲清能來風其木則栝

栢松梓櫻楠杉桂冬巖嘗青高林相望椒棘柅  
實蕃衍足用其花則木蘭辛夷著名惟舊牡丹  
多品遊人是觀繁麗貴重盛亞京洛朱華凌雪  
白蓮敷沼文通樂天昔嘗稱詠重臺之苗菑傷  
荷之珍藕見於傳記其羽族則水有賓鴻陸有  
巢翠鷓雞鵠鷺鷥鷓鷯鷓鴣之類巨細參差無不  
咸備萃亭仙禽其相如經或鳴高原或擾樊籠  
其鱗介則鱗鱖鯉鯪鰕鱖鮓乘鯨龜鼉蟹螯  
螺蛤之類惟詭舛錯隨時而有秋風起則鱸魚  
肥棟木華而石首至豈勝言哉海瀕之民以網  
罟蒲贏之利而自業者比於農圃焉又若太湖  
之恠石包山之珍茗千里之紫莼織席毳良給  
用四方皆其所產也若夫舟杭往來北自京國  
南達海徼衣冠之所萃聚食貨之所叢集乃江  
外之一都會也

風俗

太伯遜天下季札辭一國德之所化遠矣更歷  
兩漢習俗清美昔良太守糜豹出行屬沔間功

曹唐景風俗所尚景曰處家無不孝之子立朝無不忠之臣文爲儒宗武爲將帥時人以爲善言陸機詩云山澤多臧育土風清且嘉泰伯導仁風仲雍揚其波豈不然哉蓋朱買臣陸機顧野王之徒顯名於歷代而人尙文支遁道生慧響之傳唱法於羣山而人尙佛故吳人多傳學喜信施蓋有所由來也然誇豪好侈自昔有之吳都賦云競其區宇則并疆兼巷矜其宴居則珠服玉饌亦非虛語也自

本朝承平民被德澤垂髻之兒皆知翰墨戴白之老不識戈矛所利必興所害必去原田腴沃常獲豐穰澤地沮洳浸以耕稼境無劇盜里無奸宄可謂天下之樂土也顧其民崇棟宇豐庖厨嫁娶喪葬奢厚逾度捐財無益之地廢產不急之務者爲多惟在位長民者有以化之耳

門名

吳王闔廬建城之始立陸門八以象八風水門八以象八卦吳都賦云郭郭周市重城結隅通

門二八水道陸衢劉夢得詩云二八城門開道  
路五千兵馬引旌旗其傳久矣或謂八門者其  
南曰盤門以嘗刻蟠龍之狀或曰水陸相半公  
洄屈曲故謂之盤也曰蛇門者爲其於十二位  
在巳也又云以越在巳地爲木蛇北向示越屬  
吳也其西曰閶門者象天門之有閶闔也曰胥  
門者子胥居其傍民以稱焉夫差伐齊之役胥  
門巢將上軍蓋當時以巢所居爲號也門外有  
胥門塘  
其東曰婁門者婁縣名也蓋因其所道也秦謂

三穆

之嚠音留漢謂之婁今之崑山其地一也曰葑音非  
門者取封禺之山以爲名封山故屬吳郡今在  
吳興方言謂封曰葑葑者莠上穆結可以種殖  
者也其事或然曰將門者吳王使于將於此鑄  
寶劍今謂之匠聲之變也北曰齊門者齊景公  
女嫁吳世子者登此以望齊也又南曰赤門北  
有平門蓋不預入數或曰平門者故爲巫門巫  
咸所葬也當吳時不開東面之門欲以絕越其  
後稍或開塞蓋其多途則艱於守衛幾禁也今

所啓者五而已封門陸衢中或堙塞范文正公  
命闢之爲門往來至今大以爲便

學校

吳郡昔未有學以文請解者不過數人景祐中  
范文正公以內閣典籙而歎庠序之未立我先  
君光祿率州人請建學文正公請于朝奏可乃  
割南園之一隅以創焉旣成或以爲太廣范公  
曰吾恐異時患其隘耳乃置學田命師傳其後  
爲守者繼成其事富郎中嚴又建六經閣自安

四宋劉錢  
傳未刻條

定先生翼之首居於此而博洽有道之士如王

會之

逢

張舜民

芻

張公達

伯玉

之儔繼處其任

學者甚衆登科者不絕有若滕正議

元發

錢翰

林醇老

諸公稍稍以出熙寧之際朝廷選置學

官更問大義士之來者甚盛矣頃時李校理

綬

又割南園地以廣其垣然齎舍未多今猶以爲

隘也宜聖殿旁舊有又正公祠以安定先生配

歲時釋奠者皆焚香拜首學中有十題曰辛夷

百幹黃楊公堂槐鼎足松雙桐石楠龍頭檜籬

水榭泮池玲瓏石或云蘇子美嘗掌學命名也  
州宅上

郡國志云今太守所居室卽春申君之子爲假君之殿也因數失火塗以雌黃故曰黃堂又傳吳宮至秦時猶存守宮吏以火視燕窟遂火焉其遺迹雖無存者其地則未聞或改也漢會稽太守治於吳朱買臣載其故妻到太守舍置園中給食之卽此地也今郡廨承有唐五代之後昔韋蘇州詩云海上海上風雨至逍遙池閣涼白樂

天於西樓命宴齊雲樓晚望皆有篇什所謂池閣者蓋今之後池是也西樓者蓋今之觀風樓

也齊雲樓者蓋今之飛雲閣也白公詩云欲辭南國去重上北

城看木蘭堂之名亦久矣皮陸唱和詩有木蘭後

池卽此也池中有老檜婆娑尙存父老云白公

手植已二百餘載矣詢之士子云張刑部太初

作山陰堂蔣密直治後池諸亭及曠野亭見山

閣呂光祿建按武堂蔡秘閣子直置射堂裴校

理如晦立飛雲閣韓度支子文植恠石二於便



廳後榜曰介軒進晏大夫處善葺故亭於城西  
北隅號日月臺以便登覽餘則未悉聞也

### 州宅下

蓋古之諸侯有三門外曰臬門中曰應門內曰  
路門因其門以爲三朝朝之後有三寢曰路寢  
一曰燕寢二曰罷侯置守其名旣殊其制稍削  
然猶存其槩今之子城門古之所謂臬門也今  
之戟門古之所謂應門也今之便廳門古之所  
謂路門也今之大廳古之外朝也今之宅堂古

之路寢也蘇爲東南大州地望優重府庭有以  
稱自唐乾寧元年刺史成及建大廳更五代至  
于

聖朝嘉祐間年祀寢遠棟宇旣敝紫微王公君  
玉乃新作是廳選材鳩工閎敞甲諸郡陳祠部

天常

新作子城門樓觀甚偉而大廳之前戟門

之後廊廡庠陋不稱且甲仗架閣二庫在焉海  
瀕卑濕暑氣蒸潤戎器簿籍或材弊文朽不可  
用又高麗人來朝過郡郡有燕勞其從者皆坐

於廊此而不葺非所以革弊示遠也元豐六年  
太守朝議大夫章公以是說謀於轉運使得羨  
錢二百萬又以公使助之於是易以修廊覆以  
重屋二樓對立樓各八楹木章必精陶埴以良  
吏無容姦工各獻巧故省費而功速明年春落  
成又修戟門薦之高於舊三尺由是臺門至于  
府廷棟宇相副輪焉奐焉不陋不奢後無以加  
也

### 南園

南園之興自廣陵王元璩帥中吳好治林園於  
是醜流以爲沼積土以爲山島嶼峯巒出於巧  
思求致異木名品甚多比及積歲皆爲合抱亭  
宇臺榭值景而造所謂三閣八亭二臺龜首旋  
螺之類名載圖經蓋舊物也錢氏去國此園不  
毀王黃州詩云他年我若功成後乞取南園作  
醉鄉迺玩而愛之之至也或傳祥符中作景靈  
宮古侯切一字求珍石郡中嘗取於此以貢京師其  
間樓榭歲久摧圯呂濟叔嘗作熙熙堂厥後守

將亦加修飾今所存之亭有流杯四照百花樂  
豐惹雲風月之目每春縱士女遊覽以爲樂焉

### 倉務

南倉子城西北倉在閭門側皆前後臨流每歲  
輸稅於南和糶於北以元豐三年計之所糶無  
慮三十萬斛東南之計仰給於此而農民賴官  
糶以平穀價其利博哉稅務舊在驛前范文正  
公遷於西河之上官私舟楫往來輸稅者不必  
迂路至今以爲便酒務損弊前守司諫孫公請

于

朝給省金四萬緡新之晏公章公相繼趣成近  
已畢工又嘗大修南倉旣閱且固爲儲積之利

### 亭館

臨水之亭園經所載者四今漕渠之上增建者  
多矣曰按部曰緇衣曰濟川曰皇華曰使星曰  
侯春曰褻德曰旌隱之類聯比於岸矣所謂褻  
德者近於秘監富公之居旌德者近於密直蔣  
公之居昔之郡將名亭以褻二老也近歲高麗

人來貢

聖朝方務綏遠又於城中闢懷遠安流二亭及盤閭之外各建大館爲賓餞之所

### 海道

吳郡東至於海北至於江徬青龍福山皆海道也漢武帝遣嚴助發兵會稽浮海救東甌後朱買臣言東越王居保泉山今發兵浮海直指泉山陳舟列兵席捲南行可破滅也上拜買臣會稽太守詔買臣到郡治樓船備糧食水戰具居

歲餘買臣受詔將兵與橫海將軍韓說等俱擊破東越晉袁山松虞潭嘗於滬瀆築城壘以防寇自朝家承平總一海內閩粵之賈乘風航海不以爲險故珍貨遠物畢集於吳之市今瀕海皆有巡邏之官所以戢盜賊禁私鬻也

### 牧守

昔漢會稽太守治於吳自朱買臣見遇武帝引章之部世歆其榮光武時有任延者稱爲循吏延字長孫年十九爲會稽都尉迎官驚其壯及

到靜治無爲惟先選饋禮祠延陵季子聘請高  
行如董子儀嚴子陵等待以師友之禮掾史貧  
者輒分俸祿以賑給之省諸卒令耕公田以周  
窮急所行縣輒使慰勉孝子就殮飯之吳有龍  
丘長者隱居太末志不降辱掾史請召之延曰  
龍丘先生躬德履義有原憲伯夷之節都尉掃  
灑其門猶懼辱焉召之不可遣功曹奉謁修書  
記致醫藥相望於道積一歲長乃詣府願得備  
錄遂命爲議曹祭酒是以郡中賢士大夫爭往

官焉自晉至唐牧守之良者已載圖經矣於新  
唐史又得數事焉史稱王仲舒之爲刺史也隄  
松江爲路變屋瓦絕火災賦調常與民爲期不  
擾自辦于頔之爲刺史也罷淫祠浚溝澮端路  
衢爲政有績楊發之爲刺史也其治以恭長慈  
幼爲先是皆可述者也若韋應物白居易劉禹  
錫亦可謂循吏而世獨知其能詩耳韋公以清  
德爲唐人所重天下號曰韋蘇州當正元時爲  
郡於此人賴以安又能賓傳士招隱獨顧況劉

長卿丘丹秦系皎然之儔類見旌引與之誦唱  
其賢於人遠矣樂天高行美才其於簿領宜不  
以屑意然觀其勤瘁非旬休不設宴見於題咏  
嘗作虎丘路免於病涉亦可以障流潦未幾求  
去夢得贈詩云姑蘇十萬戶皆作嬰兒啼蓋其  
實也夢得之爲州當災役之後民無流徙朝廷  
以其課最賜三品服此三人者至今以爲美談  
自錢武肅王吳越以其子元璩爲刺史當兵火  
剽焚之後而元璩以儉約慎靜鎮之者三十年

與江南李氏接境而能保全屏蔽者元璩之功  
也元璩後封廣陵郡王子文奉嗣之頗亦好士  
有勝致卒官下其後忠懿王納土請吏

朝廷始除守以治之自太平興國三年至今元  
豐四年更七十二人矣

題名具  
總集

朝廷以劇郡常

慎其選非臺閣之賢潛憲之序不以輕授其風  
流文雅開敏疆濟豐功琦行貴名茂閭列于國  
史炳于家傳者多矣草野之士獨處而罕聞雖  
聞而不詳何以遽數哉今朝議大夫章公嘗將

當節省民力或  
請節以修濬之

漕二制有威名及既下車飾治衆職雖小必察  
始至會暴風湖海之瀕民或漂溺公遣吏巡視  
賑恤請蠲田租人不失所錫治奸吏繩遏浮蕩  
擊沮豪右莫不畏懾政聲流聞詔曰吏不數易  
然後得以究其材今夫蘇劇郡也而爾爲之守  
克有能稱嘉省厥勞仍其舊服往惟率職不懈  
以稱吾久任之意哉可今再任蘇守自國朝以  
來惟公再任邗人美之時議欲大修郡城增濬  
運河公務愛民力請罷其役民甚德之

人物

吳中人物尙矣漢嚴助朱買臣會稽吳人以傳  
學文詞名當時舉賢良對策者百餘人武帝善  
助對獨擢助爲中大夫而既貴幸乃薦朱買臣  
亦爲中大夫由是並在左右與大臣辯論中外  
相應以義理之文其後相繼爲會稽太守助爲  
會稽數年不聞問天子賜書曰君厭承明之廬  
勞侍從之事懷故土出爲郡吏會稽東接於海  
南近諸越北枕大江間者濶焉久不聞問具以

宋版下會  
字

春秋對助恐上書謝願奉三年計最買臣懷會稽太守章步歸郡邸長安廐吏乘駟馬車來迎會稽會聞太守且至發民除道縣長吏並送迎車百餘乘此二人者並起書生遂宰一郡福千里其為榮遇可勝哉然助能論指南越遣子入侍買臣擊破東越有功亦足以稱焉自東漢至於唐代有賢哲已具圖經而四姓者最顯陸機所謂八族未足修四姓實名家四姓者朱張顧陸也其在江左世多顯人或以相業或以傳術

或以德義或以文詞已著於舊志矣自廣陵王

元璠父子帥中吳是時有丁陳范謝四人者同

在賓幕以長者稱丁氏之後有晉公出入將相

范氏之後有文正公叅豫大政為世宗師文正

公族姪龍圖公師道以直清顯先朝履歷諫

憲謝氏之後有太子賓客濤賓客有子曰絳為

知制誥縉紳推之陳氏之後有太子中允之奇

者謝隴西郡王宅教授以歸召之不起以行義

著鄉閭謂之陳君子者也又若宣徽使鄭文肅



公以謀烈贊樞府定邊陲秘書監富公嚴以耆德守鄉邦而許洞以歌詩著名祥符之間皆吳人也而東南之才美與四方之遊官者視此邦之爲樂也稍稍卜居營葬而子遂留不去者不可以遠數也今茲宗工名傳出於吳者高則登黃扉入禁林次則帥方面列臺閣與夫里居之大老灼灼然在人耳目俟來者爲記焉

淳熙改元三月望日琴川徐日新觀于中山書樓

吳郡圖經續記卷上

篇中偏字悉作傳或詳也

吳郡圖經續記卷中

朱

長文

撰

橋梁

祠廟

宮觀

寺院

山

水

橋梁

凡十五節

吳郡昔多橋梁自白樂天詩嘗云紅欄三百九十橋矣其名已載圖經逮今增建者益多皆疊石甃麗工奇緻密不復用紅欄矣然其名未嘗遍錄也近度支韓公子文爲守命每橋刻名於

勞僮僮往來莫不見之其有名自古昔或近事  
可述者爲記於此右一

烏鵲橋在郡前舊傳有古館入曰全吳通波龍  
門臨頓昇羽烏鵲江風夷亭此橋因館得名白  
樂天詩嘗及之右二

失履橋在吳縣西南吳王有織里以自名橋謂  
之失履俗訛也右三

皋橋在吳縣西北皋伯通字奉卿所居之地也  
伯通爲漢朝議郎卒葬胥門西二百步號伯通

墩昔梁鴻娶孟光同至吳居伯通廡下爲人賃  
舂伯通察而異之乃舍之於家鴻卒又爲葬之  
是可稱也哀江南賦云皋橋羈旅亦謂此右四

百口橋在長洲縣東故傳東漢之顧訓五世同  
居家娶百口衣食均等尊卑有序因其所居以  
名之右五

乘魚橋者故傳爲琴高乘鯉升仙之地據劉向  
列仙傳云琴高趙人嘗入涿水中取龍子與弟  
子期期日皆齋潔待於祠旁果乘赤鯉來出坐

祠中留一月復入水去作湯一云在吳也列仙傳有英子者亦乘赤鯉升天吳中門戶皆作神魚遂立英祠未詳孰是右六

都亭橋在吳縣西北故傳吳王壽夢嘗於此作都亭以招賢士也死橋定跨橋故傳皆闔廬苑園遊憩之地右七

臨頓橋在長洲縣北臨頓者亦吳時館名也陸魯望嘗居其旁皮日休贈之詩以謂不出郭郭曠若郊野今此橋名居櫛比蓋此郡又盛於唐

世也

右八

至德橋在泰伯廟前以廟名橋也

右九

孫老橋在運河上天聖初郡守禮部郎中直史館孫公冕所建也孫公治蘇民所畏愛故以名

馬

右十

行春橋在橫山下越來溪中湖山滿目亦爲勝處右十一

新橋在盤門外自郡南出徒行趨諸鄉至木瀆者每過運河須舟以濟又當兩派交流之間頗

爲深廣故自昔未有爲梁者今太守朝議章公  
下車有石氏建請出錢造橋者公立限督之卽  
日而裁逾時而畢橫絕漫流分而三橋往來便  
之右十二

三太尉橋在吳縣西昔廣陵王諸子各治園第  
此橋之西巷蓋當時第三子所營治也今皆爲  
居人占籍焉右十三

吳江三橋南曰安民在新涇中曰利民在七里  
涇北曰濟民在吳涇初澄源鄉並漕河有村十

七家居河南田占河北民欲濟無梁郡從事夏  
日長爲之建橋錢子高作記右十四

吳江利往橋慶曆八年縣尉王廷堅所建也東  
西千餘尺用木萬計縈以修闌甃以淨甃前臨  
具區橫截松陵湖光海氣蕩漾一色乃三吳之  
絕景也橋成而舟楫免於風波徒行者晨莫往  
歸皆爲坦道矣橋有亭曰垂虹蘇子美嘗有詩  
云長橋跨古未有大亨壓浪勢亦豪非虛語  
也右十五

祠廟 九七節

泰伯廟在閭門內舊在門外漢胡官切帝時太

守麋豹所建錢氏移之於內盖以避兵亂也延

陵季子侑祠焉右一

包山廟在洞庭唐人於此有所而應魯望詩曰

終當以疏聞特用諸侯封右二

龍母廟在吳縣陽山郡中嘗於是祈雨而應民

所欽奉右三

常熟縣龍堂唐咸通中縣令周思輯以旱故崇

龍于破山之潭上果雨以應於是為堂以祀之

記刻今存破山即虞山也父老以謂每歲有龍

往來於陽山虞山之間其雲雨可識右四

慶忌廟在吳縣境慶忌吳王僚之子東方朔所

謂捷若慶忌也如聞俗訛為慶忿非也右五

洞庭聖姑廟晉王彪二女相繼而卒民以為靈

而祀之右六

孫學士祠堂在萬壽寺天聖中孫公冕守郡治

獄不濫斷訟如神施張在已無所吐茹吏民欽

畏之嘗病癰民爭詣佛寺祈福後又爲之立祠  
吳民到今稱之 右七

宮觀 九七節

天慶觀唐置爲開元宮孫傳之亂四面皆爲煨  
燼惟三門正殿存焉其後復修祥符中更名天  
慶觀皇祐之間新作三門尤峻壯 右一

太和宮在盤門外其地唐相畢瑊之別業也瑊  
之子師顏及其子宗逸避巢寇之亂徙而家焉  
有戴省甄者幼孤從其母嫁畢氏宗逸無子省

甄嗣之後省甄入道居開元觀開寶二年請施  
祖庄爲宮錢氏賜額曰太和乃與弟子吳玄芝  
主其締架焉王元之嘗記其事仍有詩留題 右二  
靈祐觀在洞庭山唐之神景宮也蓋明皇時建  
內有林屋洞人間第九洞天也爲左神幽虛之  
天卽天后真君之便闕真誥云勾曲洞天左通  
林屋北通岱宗西通峨眉山通羅浮言諸洞可  
以交達也舊傳禹治水過會稽夢人衣玄纁告  
治水法并不死方在此山石函中旣得之以藏

包山石室吳人得之不曉以問孔子孔子曰此禹石函文所謂靈寶經三卷蓋卽此也吳先主時使人行洞中二十餘里上聞波浪聲有大蝙蝠拂殺火觀皮陸詩信然也又有白芝紫泉爲神仙飲酎蓋列真往來其間唐時投龍於此因建宮天禧五年詔重修賜靈祐之名仍刻

敕文于石

右三

洞真宮圖經云在古毛公壇上據皮陸詩毛公者劉根也陸詩云古有韓終道授之劉先生身

如君鳳凰羽翼披輕輕按神仙傳云劉根字君安漢成帝時人舉孝廉除郎中後弃世學道入嵩山石室中崢嶸上下高五十丈冬夏不衣身毛長一二尺狀如五十許人其與人坐時忽然已高冠玄衣人不覺也根自說入山精思無所不到蓋嘗至此也聚石爲壇廣不盈畝舊傳毛公道成羅浮居山三百餘載有弟子七十二人夫神化恍惚萬里跬步夫亦何常哉有周先生隱遙字息元唐正元中來游包山之神景觀距

觀五里見白鹿跪止即毛公塢也得異石一方  
上有蟲篆即毛公鎮地符也得一井泉色白味  
甘即煉丹井也傍又有古池深廣袤丈旱歲不  
竭即毛公泉也此宮乃開成三年建蓋因先生  
云右四

上真觀在洞庭山上建於梁世唐僧皎然嘗陪  
湖州鄭使君登此却望湖水賦詩皮陸亦有此  
作詩中云昔有葉道士位當昇靈宮欲箋紫微  
志惟食虹景丹葉君不知何名也右五

乾元觀在常熟一里虞山下梁天監五年張裕  
先生來此山栖遁十餘載夢神人告曰峯下之  
地面勢閑寂可以卜居裕如教興葺號曰招真  
明昭太子爲之撰碑簡文帝嘗賜玉案一面鍾  
一口香百飭燭百鋌陳供於此其後改曰乾元  
右六

太一宮舊在郡中或傳在報恩寺之側太平興  
國中方士楚芝蘭言五福太乙天之尊神也太  
一所在之處人豐樂而無兵役凡行五宮四十



五年一移以數推之當在吳越分請就其地築宮以祀之奏可六年十月蘇州言太一宮成芝蘭又言都城東南地名蘇村可徙築宮於此以應蘇臺之名則福集帝都矣。太宗從之作太一宮於都城之南而姑蘇之宮遂廢

右七

寺院

凡三十五節

自佛教被於中土旁及東南吳赤烏中已立寺於吳矣其後梁武帝事佛吳中名山勝境多立精舍因于陳隋寢盛于唐唐武宗一旦毀去已

而宣宗稍復之唐季盜起吳門之內寺宇多遭禁剽錢氏帥吳崇向尤至於是修舊圖新百堵皆作竭其力以趨之唯恐不及鄙之內外勝刹相望故其流風餘俗久而不衰民莫不喜蠲財以施僧葦屋遠廡齋饌豐潔四方莫能及也寺院凡百三十九其名已列圖經今有增焉考其事迹可書而圖經未載者錄於此至於湖山郊野之間所不知者蓋闕如也又有寺名見於傳記而今莫知其處者如晉何點兄弟居吳之波

若寺又故傳唐有乾元寺戴逵

一本作戴顓

之宅也

宴坐寺張融之宅也又有龍華禪房唐慈崇福

慈悲陸鄉數寺皆建于六朝之間而龍華宴坐

之額乃陸柬之書今莫見之矣

右一

承天寺在長洲縣西北二里故傳是梁時陸僧

瓚故宅因覲祥雲重重所覆請捨宅爲重雲寺

中誤書爲重玄遂名之韋蘇州登寺閣詩云時

暇陟重古微切晨霽澄景光始見吳都大千里

鬱蒼蒼山川表明麗湖海吞大荒即此寺也錢

楫

氏待又加繕葺殿閣崇麗前列石寺中有別

院五曰永安曰淨土禪院也曰寶幢曰龍華曰

圓通教院也所謂寶幢者舊曰藥師院昔有錢

唐僧道贊者作紫檀香百寶幢覆以殿宇翰林

晁承旨與嘗時諸公凡二十三人爲之贊云又

有聖姑廟蓋梁時陸氏之女吳人於此祈子頗

有驗

右二

永安禪院在承天寺垣中舊號彌勒院初太

宗朝以藏經鏤板本有餘杭道原禪師者詣闕

宋版所有子  
顏整

宋無版字

借板印造景德中又以太宗御製四表及新譯經一十四表併賜之道原既歸藏于此院大中祥符八年又編修景德傳燈錄以進 敕賜今額每歲度一僧至今為禪院 右三

報恩寺在長洲縣西北一里半在古為通玄寺吳赤烏中先主母吳夫人捨宅以建晉建興二年滬瀆漁者見神光照水澈天旦而觀之乃二石像浮水上或曰水神也以三牲巫祝迎之像泛流而去時吳人率僧尼輩迎於海濱入城置

銘家作傳

於通玄寺光明七晝夜不絕號其殿曰二尊建興八年漁者於滬瀆沙上獲帝青石鉢初以為曰類輦而用焉俄有佛像見于外漁者異之知其為二像之遺祥也乃以供佛梁簡文製石像銘云有迦葉佛維衛佛梵字刻于醜間唐天后遣使致珊瑚鑑一鉢一供於像前又有陸柬之書碑開元中詔天下置開元寺遂改名開元金書額以賜之寺中有金銅玄宗聖容當天下昇平富商大賈遠以財施日或有數千緡至於梁

柱藥楹之間皆綴珠璣飾金玉蓮房藻井悉皆  
寶玩光明相輝若辰象羅列也大順二年爲淮  
西賊孫傳焚毀其地遂墟同光三年錢氏更造  
寺於吳縣西南二里半榜曰開元并其僧遷焉  
卽今之開元寺也今開元寺有瑞像閣乃別加  
塑飾其帝書石鉢猶存周顯德中錢氏於故開  
元寺基建寺移唐報恩寺名於此爲額卽今寺  
也唐之報恩寺在吳縣之報恩山卽支硎山也  
自梁武帝建寺經唐武宗殘毀至是乃移額於

此寺有寶塔頃罹火災郡人復建巨殿窮極雕  
麗爲東南之冠今僅畢工云寺有別院三曰泗  
州曰水陸爲禪院曰法華爲教院

右四

普門禪院在報恩寺旁景德中日本僧寂照號  
圓通大師來貢京師上召賜紫衣束帛寂照  
願遊天台山詔令縣道續食丁晉公時爲三  
司使爲言姑蘇山水奇秀寂照願留吳門遂居  
此院朝宰諸公并作詩送之刻石院中

右五

承天萬壽禪院在長洲東南錢氏時中吳從事

宋無  
帖字

晴霽

右八

雍熙寺在吳縣北故傳郡人陸氏捨宅以置號

曰沈水舊有三殿三樓高僧清閑所建也雍熙  
中改今額寺之子院三曰華嚴曰普賢曰泗州  
皆為講教之所 右七

瑞光禪院在盤門內故傳錢氏建之以奉廣陵  
王祠廟今有廣陵像及平生袍笏之類在焉嘉  
祐中轉運使李公復圭請本禪師住持吳民競  
致力營葺棟宇 胡官切 新相國富公有書頌刻

石院 中 右八

廣化禪院在長洲縣西錢氏時大校捨所居以

此字應讀

置久而摧敝自嘉祐以來稍稍繕完門廡巖新有藏院可以安衆

右九

永定寺在吳縣西南梁天監中吳郡顧氏施宅為寺唐陸鴻漸書額韋蘇州罷郡寓居永定殆此寺邪舊在長洲界後於永定鄉安仁里

右十

宋夫縣字

壽寧萬歲禪院在長洲縣東南唐武通中州民盛楚等建為般若寺至道九年敕賜御書四十八卷二年改今額吳地志郡中有般若臺內有金銅像高一丈六尺高士戴顛所製訪之未

得其遺迹此寺舊名般若殆是歟

右十一

定惠禪院本萬歲之子院祥符中別改今額內

藏御書歲得度僧一人稚為叢林唱道之所

右十二

大慈院在長洲縣北唐咸通三年陸侍御以宅

為院號為北禪祥符中改今額皮陸有北禪避

暑聯句注云院昔為戴顛宅後司勳陸郎中居

之即此是也

右十三

明覺禪院在長洲縣東南俗所謂東禪者晉開運中有僧遇賢姓林氏嘗以酒食自縱酒家或

遇其飲則售酒數倍於他日世號爲酒仙而能  
告人禍福必驗與符治疾者必痊建隆二年來  
居是院創佛屋修路衢無慮用錢數百萬雖稱  
丐於人而人不知其所從得者蓋其容似靈巖  
智積聖者而每與人符以陳僧爲識或謂爲後  
身其塑像今存院中

右十

朱明尼寺在吳縣西北舊傳東晉時有朱明者  
富而孝友其弟聽婦言伐木塿宅欲弃兄異居  
明乃以金穀盡與弟唯留空室一夕大風雨悉

飄財寶還明弟與婦愧而自縊明乃捨宅爲寺

右十

雲巖寺在長洲西北九里虎丘山即晉東亭獻

穆公王珣及其弟珉之宅咸和二年捨建精廬  
於劔池分爲東西二寺寺皆在山下蓋自會昌  
廢毀後人乃移寺山上今東寺皆爲民疇西寺

半爲榛蕪矣寺中有御書閣官廳白雲堂五

聖臺登覽勝絕又有陳諫議

省華

王翰林

偶葉少

列參蔣宰直堂真堂寺前有生公講堂乃高僧

竺道生談法之所舊傳生公立片石以作聽徒  
折松枝而爲談柄其虎跑泉陸羽井見存比歲  
琢石爲觀音像刻經石壁東額草堂亦爲佳致  
惜已廢壞右十

西菴禪院在庠丘西本屬雲巖後別爲院蓋亦  
古西寺之地近歲頗增葺右十

普明禪院在吳縣西十里楓橋楓橋之名遠矣  
杜牧詩嘗及之張繼有晚泊一絕孫承祐嘗於  
此建塔近長老僧慶來住持凡四五十年修飾

胡官切備面山臨水可以遊息舊或誤爲封橋  
一字完今丞相王郇公頃居吳門親筆張繼一絕於石  
而楓字遂正右十

壽聖義慈禪院在閭門外樞密直學士施公昌  
墓側近得賜額右十

天峯院在吳縣西二十五里報恩山之南峰東  
晉時高僧支遁者嘗居於此故有支礪之號山  
中有支遁石室馬迹石放鶴亭皆因之得名昔  
唐自有報恩寺在山麓故樂天夢得遊報恩寺



作詩蓋自武宗時報恩寺廢雖興葺不能復故  
皮陸猶有報恩寺南池聯句其後益淪壞至乾  
德中錢氏於報恩寺基作觀音院今名楞伽院即其  
地也所謂南峯者乃古之報恩之屬院耳院枕  
巖腹躋攀幽峻自報恩寢衰而南峰乃興大中  
五年號爲支山天福五年改曰南峯 聖朝賜  
以今額禪老相承殿閣堂廡奐然一新矣山中  
危壁竦立石門夾道前對牛頭山旁作西庵又  
有碧琳泉待月嶺南池新泉之類自昔著名故

傅裴休書額已亡矣

右二

天平寺在吳縣西南天平山下山有白雲泉始  
見於白公詩其寺建於寶曆二年乃樂天爲蘇  
州刺史之歲蓋因泉以興寺也范文正公之先  
葬其旁 賜額曰白雲寺中有文正公祠堂

右二

十一

澄照寺在長洲縣西北陽山下方俗以爲了令  
威所居圖經吳縣界有了令威宅此殆是歟錢  
氏時有泉出於寺中因名仙泉後改曰澄照寺

吳郡田... 右二  
十二

白蓮禪院本澄照別菴池中生千葉白蓮故以名院端拱初謝賓客清嘗講學于院之西廡明年登第其子絳嘗刻石為記右二

秀峰寺在靈巖山梁天監中置既經一紀忽有

異人於殿隅畫一僧相俄而梵僧見之曰此智積菩薩也化形隨感靈應甚多儀相雖經傳繪

吳民瞻奉至今彌勤此寺古故宮之境景物清絕舊乃律居不能興葺徒長紛訟太守晏公闢

為禪刹人甚便之右二  
十四

堯峰院在吳縣橫山旁俗傳堯民於此避水蘇

子美詩云西南登堯峯俗云堯所基洪川不能沒上有萬象棲謂此也唐末慧齊禪師首建精

舍名曰免水後改曰堯峯盖亦有所傳也登高

極目鄰州隱隱然右二  
十五

楞伽寺在吳縣西南橫山下其上有塔據橫山

之巔隋時所建有石記存焉白樂天及皮陸有詩載集中寺旁有巨井深不可測井有石闌闌

吳郡田... 天中

側有隋人記刻蓋楊素移郡橫山下嘗居此地  
又有寶積治平二寺相連皆近建也

右二  
十六

明因禪院在橫山下廣陵王元璩墓在其旁故  
號薦福昔義懷禪師居此終焉院有藏經故傳  
廣陵姬媵所書

右二  
十七

感慈禪院與薦福相並乃宣徽使鄭文肅公墳

寺

右二  
十八

智顯禪院在橫山下梁人吳廣施所居爲寺號  
曰寶林錢氏改名寶華故今名寶華山祥符中

心印軻禪師重建殿堂經藏合三百楹號爲勝  
刹初鉢鉢和尚以錫扣石清泉爲流雖水旱不  
增減軻師引泉足用訖今猶存

右二  
十九

光福寺在吳縣西南建於梁世近歲居人獲觀  
音銅像於水濱乃置寺中民間瞻奉頗有應感  
本郡或迎就城中祈請皆驗云

右三  
十

高峯禪院在胥山故在洞庭近歲郡人張諮葵  
親于胥山下旁建精舍乃請移賜額于此諮弟

曰詢今爲戶部員外郎

右三  
十一

水月禪院在洞庭山縹緲峯下抵吳縣百里建於梁廢於隋至唐光化中有浮圖志勤者結廬於此因而經右候切二字至數十百楹天祐四年刺史曹珪以明月名之大中祥符中易今名山旁有泉其潔歲旱不涸右三十二

孤園寺在洞庭梁散騎常侍吳猛之宅施為精

舍右三十三

慧聚寺在崑山縣西北三里馬鞍山孤峯特秀極目湖海百里無所蔽昔高僧慧響梁武帝之

師宴坐此山二虎為侍感致神人願致工力乃請師之嚶驟是夜風雷暴作喑鳴之聲人皆聞之遲明殿基成矣延袤十七丈高丈有二尺巨石轟然其直如矢非人力所能成縣令以聞武帝命建寺敕張僧繇繪神於兩壁畫龍於四柱婁鄉之民病癘瘡者至壁下乃愈每陰晦欲雨畫龍灑灑其潤鱗甲欲動僧繇又畫鑰以制之會昌中瘞寺藏龍柱於郡中大中修復乃復以柱并金書牌鴻鍾還之至道中郡將陳公嘗

游是寺巉穴奇巧勝致甚多詩人孟郊張祐有詩今丞相王荆公次韻作之刻于石右三

興福寺在常熟縣破山爲海虞之勝處齊郴州敕史倪德光捨宅爲寺唐常建詩云竹迳通幽處禪房花木深山光悅鳥性潭影空人心即此地也山中有龍闢碣唐正觀中中嬸生白龍與一龍鬪於此而成此碣有空心潭因常建詩以立名有御賜鍾唐懿宗咸通六年所賜有文舉塔體如塔二人者唐之高僧也有救虎閣五代

時僧彥周爲虎拔箭於此有宗教院雍熙中高僧晤恩修天台教於此故以名云近劉御史極宰邑作八咏以志其事云右三十五

山十五節

吳郡諸山名載圖籍者甚衆不復殫紀輒再考傳記補其缺漏以資博覽云右一

虎丘山在吳縣西北九里舊經載之已詳吳越春秋越絕書之類皆以爲闔閭所葬有金精之異故名虎丘然觀其巖壑之勢出於天成疑先

有是丘云蓋聞因之以葬也晉王珣撰山銘云  
虎丘先名海涌山又云山大勢四面周嶺南則  
是山運兩面壁立交林上合升降窈窕亦不卒  
至蓋得其實褚淵嘗歎曰今人所稱多過其實  
今觀虎丘逾於所聞故傳以爲江左丘壑之表  
云舊傳秦王求劍地裂爲池太平寰宇記云山  
礧是孫權所發以求闔閭寶器是非未可必也  
礧側有平石可容千人故謂之千人坐傳俗因  
生公講法得名右

橫山在吳縣西南十道誌云山四面皆橫蓋以

此得其名也又名踞湖山

踞或作據

山中有陸雲墓

今未審其處也觀是山鎮此邦之西南臨湖控

越實吳時要地隋開皇中嘗遷郡於橫山東亦

以是山爲屏蔽也山周圍甚廣環以佛刹如薦

福楊伽寶華堯峯之類皆在焉薦福寺旁有五

塢皇祐中節度推官馬雲與山人仇道名之曰

芳桂曰修竹曰飛泉曰丹霞曰白雲蓋因其物

象云右

姑蘇山在吳縣西三十五里連橫山之北或曰  
姑胥或曰姑餘其實一也傳言闔廬作姑蘇臺  
一曰夫差也據左氏傳云闔閭食不二味居不  
重席器不彫鏤宮室不觀舟車不飾而吳越春  
秋言闔閭書游蘇臺蓋此臺始基於闔閭而新  
作於夫差也以全吳之力三年聚材五年而後  
成高可望三百里雖楚章華未足比也初越王  
得神木一雙大二十圍長五十尋巧工施校制  
以規繩雕治刻削錯畫文章嬰以白壁鏤以黃  
金狀類龍蛇文彩生光獻於吳王王大悅受而  
起姑蘇之臺申胥諫曰王既變緣禹之功而高  
高下下以罷民於姑蘇吳民離矣夫差既亡麋  
鹿是游昔太史公嘗云登姑蘇望五湖而今人  
殆莫知其處嘗欲披草萊以訪之未能也右四  
胥山在吳縣西四十里寰宇記云吳王殺子胥  
投之於江吳人立祠江上因名胥山酈善長水  
經云胥山上今有壇長老云胥神所治也下有  
九折路而出太湖闔閭造以遊姑胥之臺而望

太湖也武曰姑蘇山一名胥山

石五

崔嶺山在吳縣西南一十五里圖經云形如獅子今以此名山也酈善長以爲崔嶺山云俗說此本在太湖中禹治水移進近吳又東及西南有兩小山皆有石如卷犇云禹所用牽山也太湖中有淺地長老云是崔嶺山麓自此以東差深蓋閭巷之談云吳地記云吳王僚葬此山山旁有寺號曰思益樂天嘗遊之

右六

報恩山一名支硎山在吳縣西南二十五里昔

有報恩寺故以名云所謂南峯東峯皆其山之別峯也今有楞伽天峯中峯院建其旁樂天詩云淨石堪敷坐寒泉可濯巾卽此山也

右七

研石山在吳縣西二十一里山西有石鼓亦名石鼓山越絕書云吳人於研石置館娃宮楊雄方言謂吳人呼美女爲娃蓋以西子得名耳吳都賦云幸乎館娃之宮張女樂而娛群臣卽謂此也山頂有三池一曰月池曰研池曰玩華池雖旱不竭其中有水葵甚美蓋吳時所鑿也山



或曰應作  
或曰應作  
或曰應作

上舊傳有琴臺又有響屨廊或曰鳴屨廊以棟  
梓籍其地西子行則有聲故以名云下有石室  
今存俗傳吳王囚范蠡之地山相連屬有巒村  
其山出石可以爲研蓋研石之名不虛也嘗登  
靈巖之巔俯具區瞰洞庭烟濤浩渺一目千里  
而碧巘翠塢點綴於滄波之間誠絕景也或曰  
晉陸玩施宅爲寺卽靈巘寺也右八

陽山在吳縣西北三十里一名秦餘杭山一名  
四飛山有白堊可用圻塲潔白如粉唐時歲以

供進故亦曰白磻山吳越春秋云越王癸夫差  
於秦餘杭山卑猶蓋卽此山也今澄照寺白蓮  
院在其下右九

華山在吳縣西六十里於群山獨秀望之如屏  
長林荒楚蒼鬱幽邃或登其巔者見有石如蓮  
華狀蓋亦以此得名或云晋太康中曾生千葉  
蓮花也老子枕中記謂可以度難蓋巘穴深遠  
宜就隱也舊有興教院院據山半近歲改爲禪

刹右十

天平山在吳縣西二十里巍然特高羣峰拱揖郡之鎮也林木秀潤瞻之可愛遊者陟危磴攀巨石乃至山腹其上有亭亭側清泉泠泠不竭所謂白雲泉也自白樂天題以絕句范文正繼之大篇名遂顯於世有卓筆峰卧龍峯巾子峰五丈峯石龜照湖毛魚池大小石屋蓋因好事者得名 右十一

穹窿山在吳縣西六十里舊傳赤松子食桂實石脂絕食仙去嘗於此山採赤石脂吳都賦云赤須蟬蛻而附麗謂此也 右十二

包山在震澤中山有林屋洞昔吳王嘗使靈威丈人入洞穴十七日不能窮得靈寶五符以獻卽此洞也水經注云山有洞室入地潛行北通琅琊東武俗謂之洞連魯哀公元年夫差敗越於夫柎蓋卽此山也或曰太湖中別有夫柎山蓋與此山不遠可以通稱湖中之山有謂之大雷者小雷者三山者昔人或號曰三山湖舊傳震澤有七十二山唯洞連最巨耳樂天嘗汎舟

洞連著公篇什陸龜蒙皮日休有太湖詩二十  
篇如神景宮毛公壇縹緲峯桃花塢明月灣練  
瀆投龍潭孤園村上真觀銷夏灣聖姑廟菴裏  
石版之類皆在此山蘇子美云洞連民俗真朴  
歷歲未嘗有訴訟至縣吏進下以桑柘甘柚爲  
常產每秋高霜餘丹苞朱實與長松茂木相差  
於巖壑間望之若金翠圖繪之可愛云右十三  
崑山在本縣西北或曰在華亭蓋割崑山之境  
以縣華亭故也晉陸機與其弟雲生於華亭以

文爲世所貴時人比之崑岡出玉故此山得名  
右十四

海隅山在常熟山有二洞穴穴側有石壇週迴  
六十丈山東二里有石室吳仲雍周章闔閭長  
子並葬此山山西北三里有越王勾踐廟梁昭  
明太子作招真治碑云虞山巫咸之所出也高  
巖鬱起帶青雲而作峯瀑布水懸流雜天河而  
俱會又云其峯有石城石門即此山也右十五

水凡十節

太湖在吳縣西南禹貢謂之震澤周官爾雅謂之具區史記國語謂之五湖其實一也吐吸江海包絡丹陽義興吳郡吳興之境其所容者大故以犬稱焉書云三江既入震澤底定三江者北江中江南江也歷丹陽毗陵者爲北江即今之大江也首受蕪湖東至陽羨者爲中江分于石城過宛陵至于具區者爲南江三江在震澤上下而皆入於海震澤之流有所洩是以底定今三江故道中絕故震澤有泛濫之患理勢然

也所謂五湖者蓋所納之湖有五也郭景純江賦云包五湖以盪漭言江水經緯五湖而包注震澤也舊傳五湖之名各不同圖經以謂一曰貢湖二曰遊湖三曰胥湖四曰梅梁湖五曰金甌湖又曰菱湖鄞善長以謂長塘湖貴湖上湖瀟湖與太湖而五韋昭云胥湖蠡湖洮湖瀟湖就太湖而五虞仲翔云太湖東通長洲松江水南通烏程霅溪水西通義興荆溪水北通晉陵瀟湖水東連嘉興霅溪水凡五道謂之五湖陸

魯望以謂太湖上稟咸池之氣故一水五名又  
爲仙家浮玉之北堂故其詩曰嘗聞咸池氣下

注作清質至今涵赤霄尚且浴白日又云

古候一切一

字浮玉宛與崑閬一正此謂也湖中有山大小

七十二洞庭其一也其大雷小雷山相去十里

其間謂之雷澤或謂舜之所漁非也又有三山

白波天合三點黛色陸士龍贈顧彥先詩云我

家五湖陰君住三山陽是此山也

右一

淞江出太湖入于海韋昭以爲三江者淞江浙

江浦陽江也今浙江浦陽與震澤不相入韋說

非也昔吳王軍江北越王軍江南越王中分其

師以爲左右軍銜枚沂江五里以須中軍銜枚

潛涉吳師大北卽此江也酈善長云淞江自湖

東北逕七十里江水分流謂之三江口吳越春

秋云范蠡去越乘舟出三江之口入五湖之中

此謂也庾仲初揚都賦注云太湖東注爲淞江

下七十里有水口分流東北入海爲婁江東南

入海爲東江與淞江而三此非禹貢之三江也

今觀松江正流亦吳江縣過甫里逕莖亭入青龍鎮海商之所臻集也圖經云松江東瀉海曰滬瀆亦曰滬海今青龍鎮旁有滬瀆村是也江流自湖至海凡二百六十里岬各有浦凡百數其間環曲而爲匯者甚多賴疏濬而後免於水患或傳松江口故深久淤而不治稍稍乃淺故可爲梁以渡然或遇大水不能遽泄者以此也松江一名笠澤陸魯望居甫里號所著曰笠澤叢書右二

宋開

運河出震澤傳稱吳城卅溝通江淮國語亦云夫差起師北往開爲深溝通於商魯之間蓋申此河以通江北也隋大業六年敕開江南河自京口至餘杭郡八百餘里而濶十餘丈擬通龍舟巡會稽陸士衡詩云閭門何峨峨飛閣跨通波樂天詩云平河七百里沃壤兩三州皆謂此水也歲旱或淺淤故常加浚治乃得無阻右三新河在 cities 杜荀鶴詩云夜市賣菱藕春船載綺羅蓋指此地祥符中崇儀使秦羲守郡日嘗

開廣之右四

七堰者皆在州門外據樂天詩云七堰八門六十坊而圖經云廢堰一十有六蓋樂天指其近者言之也舊說蓄水養魚之所或云所以遏外水之暴而護民廬近世城中積土漸高故雖開堰無甚患也左五

越來溪在吳縣之境自太湖過橫山至于郡城之西蓋越王由此水至于吳故得此名右六  
谷水據酈善長云松江一東南行七十里入小

漱東故

湖自湖東南出謂之谷水谷水出小湖逕由卷縣故城下即秦之長水縣又東南逕嘉興縣城西鹽官縣故城南過武原出爲澈浦以通巨海陸機詩云彷彿谷水陽眷戀崑山陰即此水也蓋此渠足以分震澤松江之水南入于海也後世谷水埋廢人不復知其名故吳中多水嘗質於老僂長者謂松江東流聚爲小湖西北接白蠟馬騰谷瑋瑁四湖蓋所謂谷湖者即谷水之舊迹也又南接三泖泖有上中下之名故傳陸

士衡對晉武序云三泖冬溫夏涼蓋此地也泖之狹者猶且八十丈又下接海鹽之蘆瀆浦海鹽卽武原也行二百餘里南至浙江疑此卽谷水故道水經以謂入海而此浦入江者蓋支派之異也梁大通二年以吳興水災詔遣前交州刺史王弁開大瀆導洩震澤以瀉浙江中蓋此浦是也浦旁頗有遺迹至唐時乃設堰以隔海潮嘉祐中姑蘇水災詔遣都官員外郎沈疇相視嘗欲開此浦未克興功

右七

崑山塘自婁門歷崑山縣而達于海卽婁江也據酈善長引庾仲初揚都賦注云太湖東注爲松江下七十里有水口分流東北入海爲婁江東南入海爲東江與松江而三也按婁者縣名今之崑山是也塘之兩泖又爲六塘四十四浦六十四浮接引湖澤乃昔人所以泄具區之暴流備民疇之灌溉也

右八

常熟塘自齊門北至常熟百餘里皆有涇浦入

元閩

蓋麗其渠以洩水則有涇引其流以至



江則有浦其名過衆而崑湖陽城湖之水皆賴以泄焉右九

新洋江在崑山縣界本有故道錢氏時常浚治之號曰新洋江既可排流潦以注松江又可引江流溉岡身也右十

吳郡圖經續記卷中

卷下  
治水 往迹 園第 冢墓 碑碣 事迹 雜錄  
後序

吳郡圖經續記

吳郡圖經續記卷下

朱長文撰

治水 往迹 園第 冢墓 碑碣

事志 雜錄

治水

地勢傾於東南而吳之爲境居東南最卑處故宜多水昔禹之治水也因其勢之可決者疏而爲三江因其勢之必聚者瀦而爲五湖乃底於定微禹功其能不魚乎自三江故道旣廢而五



湖所受者多以百谷鍾納之臣浸而獨洩於松陵之一川勢不能無浸溢之患也觀昔人之智亦勤矣故以塘行水以涇均水以塍禦水以埭儲水遇淫潦可洩以去逢旱歲可引以灌故吳人遂其生焉前代經營之迹多不見史至唐元和中開常熟塘古碣僅存頗稱灌溉之利其郡守氏李不著庶使氏韓韓皋元和三年為浙西觀察使錢氏時嘗置都水營田使以主水事募卒為都號曰撩淺蓋當是時方欲富境禦敵必以是為先務自

國朝天禧天聖間吳中水災於是命發運使張綸同郡守經度於崑山常熟各開衆浦以導積水景祐中范文正公來治此州適當歉歲深究利病不苟興作公以謂松江不能盡洩震澤衆湖之水雖北歷揚子江東底巨海河渠至多堙塞已久不能分其勢今當疏導諸邑之水東南入于松江東北入于揚子與海也於是親至海浦開浚五河詢之舊老云昔是時論者沮之或曰江水已高不納此流或曰日有潮至水安得

下或曰沙因潮至數年復塞或曰開浚之役重勞民力公以謂江海善下故得爲百谷王豈能不下於此謂江水已高不納此流者非也彼日之潮有損與盈三分其時損居二焉乘其損而趨之勢孰可禦謂日有潮至水安得下者非也新導之河必設諸閘常時局之沙不能塞每春理其閘外工減數倍亦復何患謂之因潮至數年復塞者非也東南所殖唯稻大水一至秋無他望俾之遵達溝瀆脫百姓於饑餧佚道使之

雖勞不怨謂開浚之役重勞民力者非也於是力破浮議䟽淪積潦民到于今受其賜有盤龍匯者介於華亭崑山之間步其徑纔十里而流冗迂緩逾四十里江流爲之阻遏盛夏大雨則泛溢旁齧淪稼穡壞室廬殆無寧歲范公嘗經度之未遑興作寶元元年太史葉公清臣漕按本路遂建議醜爲新渠道直流速其患遂弭厥後轉運使沈立之又開崑山之顧浦頗爲深浚

納陽城湖

南吐松江舊謂之崑山塘隄防不立風濤相乘  
廢民疇阻舟楫盜剽鹽買行其間吏莫能禁由  
唐以來欲修築未克也皇祐中王丞相以舒州  
通判被旨來相水事荆公與縣吏拿舟徧視訊  
其鄉人佯圖以獻至和中崑山主簿丘與權白  
郡守呂光祿居簡以為作塘有大利呂公從之  
於是調民興役先設外防以遏其上流立橫埭  
以限之乃自下流浚而決焉既成號曰至和塘  
嘉祐之間吳人荐饑朝廷選擇守將經制其事

殖

蔡秦州抗自校理典是郡嘗請行縣按水親度  
其利是時李兵部復圭為轉運使韓殿省正彥  
宰崑山於是大修至和塘使之切厚民得因  
依立塍塌以免水患而韓君又開松江之白鶴  
匯如盤龍之法皆為民利轉運使王純臣建議  
請令蘇湖常秀修作田塍位位相接以禦風濤  
令縣令教誘殖利之戶自作塍岸定其勸課為  
殿最當時推行焉其後論水者益多儒者傳臆  
欲決松江之千墩金城諸傳滌滌去淤滯又欲

開無錫之五瀉堰以減太湖而入于北江導海  
鹽之蘆瀝浦以分吳松而入于浙水於崑山常  
熟二縣深闢浦港遇東南風則水北下於揚子  
遇西北風則水南下於吳松庶可紓患又令有  
田之家據頃畝疏鑿溝港司農丞郊曾請先取  
崑山之東常熟之北凡所謂高田者一切設堰  
豬水以灌溉之又浚其溝洫使水周流於其間  
以浸潤之立柵門以防其壅則高田不涸而水  
田亦減流注之勢然後取一今之凡謂水田者

田者除四湖外一切罷去如某家涇某家洪之  
類循古遺迹或五里七里而為一縱浦又七里  
或十里而為一橫塘因塘浦之土以為隄岸使  
塘浦闊深隄岸高厚則水不能為害而可使趨  
於江也郊銜命至蘇經度其事而工重役大不  
克成既而朝廷置農田水利使者以專其事所  
以浚河渠固防岸通汰澮事在有司存可以按  
見其迹自熙寧之末旱災之後累年頗稔由是  
興作差簡然水旱之數古所不免而長民者不

可以緩其防也嘗聞瀕海之地區阜相屬俗謂之岡身此天所以限滄溟而全吳人也雖有涇浦而

日為潮沙之所積久則淤澱是不可以不治也夫治水者當浚其下流既通則上流可導也

范文正公嘗與人書云天造澤國衆流所聚或淫雨不能無災而江海之涯地勢頗高溝瀆雖

多不決不節宋本作下字如無所壅良可減害若其

濬深江潮乃來愆亢之時萬戶缺漑此所以旱潦皆為利矣此智者之言也范公之迹固未遠

求其舊而續其功不亦善哉至於羣言衆說各有見焉擇其可行者裁而行之斯善矣夫事有興於古人而廢於後世有遺於前代而補於來今苟為古人所興者勿廢前之所遺者必補則何利之不成何病之不柅哉

往蹟 凡二十六節

長洲苑吳故苑名在郡界昔枚乘諫吳王云漢修治上林雜以離宮積聚玩好園守禽獸不如長洲之苑游曲臺臨上路不似朔夕之池吳都



賦亦云帶朝夕之濬池佩長洲之茂苑註云有朝夕池謂潮水朝虛夕虛因名焉庾信哀江南賦云連茂苑於海陵跨橫塘於江浦亦取諸此右闔閭城卽今郡城也舊說子胥代楚還師取丹陽及黃濱土以築葢利其堅也郡城之狀如亞字唐乾符三年刺史張傳嘗修胡官切此城梁龍德中錢氏又加以陶甃右二闔閭故名闔閭門吳王闔閭時有之或云魯匠般所製也有高樓閣道吳兵後由此出伐楚改

曰破楚門吳屬楚復曰闔閭右三

吳小城白門蓋闔廬所作至秦始皇時守宮吏燭燕窟失火燒宮而此樓故存右四

魚城在吳縣西橫山下遺址尚存蓋吳王控越之地宜爲吳城謂之魚城誤也橫山之旁岡勢如城郭狀今猶隱隱然又有射臺亦在橫山右五

石城在吳縣東北故爲離宮越王獻西子於此山有石馬望之如人乘之右六

華池華林園南城宮故傳皆在長洲界闔閭之

故迹也有流杯亭在女墳湖西二百步亦云游樂之地又有吳宮鄉陸魯望以謂在長洲苑東南五十里蓋夫差所幸之別觀故得名焉魯望作問吳宮辭辭載總集

右七

三泖在華亭境魯望詩云三泖涼波漁蕪動謂此也

右八

洞庭亦多吳時舊迹所謂練瀆者練兵之所也傳云越敗吳於夫椒夫椒卽包山也湖岸極清處爲銷夏灣乃吳王游觀之地

右九

雞陂墟者畜雞之所狶巷者畜彘之處走狗塘者田獵之地也皆吳王舊迹並在郡界又有五茸茸各有名乃吳王獵所陸魯望詩云五茸春

早雉媒嬌謂此也

右十  
茸今松江

蠡口在長洲界又謂之蠡塘昔范蠡扁舟浮五

湖蓋嘗經此

右十一

胥口在姑蘇山西北十二里因胥山得名

右十二

壇塘在吳縣東南三十五里大江邊夫差十二年旣殺子胥投尸於江浮以鴟夷革後悔之君

臣臨江作塘創設祭奠百姓緣為立廟宋元嘉三年吳令徙廟匠門內一云壇塘邊有酒城夫差祭于胥觀酒一作酌酒因名之右十二

潁市在郡西二十五里圖經云秦王求吳王劍白虎蹲於丘上遂西走二十五里而失劍不能得地裂為池因名其地曰虎喙音雷蓋此地是也

唐諱琥錢氏諱鏐故改云潁市右十四

胥屏亭在吳縣界漢初有陸烈士伯元為吳令豫章都尉既卒吳人思之迎其喪葬于胥亭子

孫遂為吳縣人吳郡陸氏之所自出也右十五

袁山松城在滬瀆江側為波濤衝激半毀江中

袁山松城東三十里夾江又有二城相對闔閭

所築以控越處古人於海道固為之防矣右十六

死亭灣在閭門外七里故傳朱太守妻慚自經

於此右十七

新郭在吳縣西橫山下隋既平陳江南未服聚為盜賊隋文帝以楊素為行軍總管討之追擊至蘇州移郡邑於橫山下蓋欲空其舊城耳此

新郭者當時之遺址也或曰越王城亦在焉蓋此地吳越之所控守也初楊素遷城於橫山也匠者以楮木爲城門之柱素見之謂匠者曰此木恐非堅可閱幾年匠曰可四十年不朽素曰足矣是城不四十年當廢至唐貞觀中復舊城果如其言 右十八

蓮塘寰宇記云在吳縣西十二里有田數畝生蓮華千葉華麗 右十九

望市樓据元微之詩寄樂天云美潮船更曾觀

否望市樓還有會無註云望市樓蘇之勝地也今觀風樓爲近市殆卽此耳 右二十

東城桂白樂天云蘇之東城吳都城也今爲樵牧場有桂一株生乎城下惜其不得已也 詩總集 右二十一

望亭在吳縣西境吳先主所立謂之御亭隋開皇九年置爲驛唐常州刺史李襲譽改今名劉禹錫詩云懷人吳御亭謂此也 右二十二

柳毅泉事具圖經泉在太湖之濱雖大風撓之不濁雖旱不耗此所以爲異 右二十三

滬瀆松江東寫海曰滬瀆陸龜蒙敘矢魚之具  
云列竹於海溼曰滬蓋以此得名今其旁有青  
龍鎮人莫知其得名之由詢于老宿或曰因船  
得名按庾信哀江南賦云排青龍之戰艦南史  
楊素伐陳以舟師至三峽陳將戚欣以青龍百  
餘艘屯兵守狼尾灘楊素親率黃龍十艘銜枚  
而下擊敗之則青龍者乃戰艦之名或曰青龍  
舟孫權所造也蓋昔時嘗置船於此地因是名  
之耳 右二十四

吳王之時劔有干將莫邪甲有水犀舟有鯨鯢  
干將者劔工也莫邪者干將之妻也始干將作  
劔採五山之鐵精六合之金英候天伺地陰陽  
同光百神臨觀天氣下降而金鐵之精不銷於  
是莫邪曰神物之化須人而成今夫子作劔當  
得其人而後成乎於是干將妻乃斷髮剪爪投  
於鑪中使童男童女三百人鼓橐裝炭金鐵乃  
濡遂以成劔陽曰干將陰曰莫邪陽作龜文陰  
作緹理干將匿其陽出其陰而獻之闔閭闔閭

甚重之水犀者徼外有山犀水犀水犀之皮有珠甲山犀則無吳人蓋以水犀飾甲也餘艘者大舟也勾踐泝江襲吳入其郛焚其姑蘇徙其大舟卽此也 右二十五

大酒巷舊名黃土曲唐時有富人修第其間植花濬池建水檻風亭醞美酒以延賓旅其酒價頗高故號大酒巷 右二十六

園第

凡二十五節

伍子胥宅故傳在胥門旁子胥諫吳王王不聽

使子胥於齊子胥屬其子於齊鮑氏還報吳王吳王聞之怒賜之屬鏹子胥曰吾死必抉吾目置之吳東門以觀越兵之入也 右一

言偃宅在常熟縣西北宅中有井闊三尺深十丈井旁有壇壇北百步有浣沙石方四尺縣有言偃橋蓋得名於此子游以文學升聖師之堂吳人好儒術其有所自哉 右二

長鍊巷一名彈鍊巷在吳縣東北二里巷有馮煖宅煖客在齊孟嘗君之門彈長鍊而歌者也

焚虛券以彰孟嘗君美聲說齊王以復孟嘗君  
相位其顯名也宜哉唐人云有墳在側碑刻猶  
存舊傳郡郭三百餘巷蓋昔有名而失之惜哉  
陸氏鬱林石初陸績事吳爲鬱林太守罷歸無  
裝舟輕不可越海取巨石爲重至姑蘇置其門  
號鬱林石世保其居唐史書之

右四

晉東亭獻穆公王珣與其弟珉宅外在虎丘內  
在白華里後皆施以爲寺昔虎丘東西二寺今  
之景德寺皆是也景德寺舊號虎丘解院晉書

云吳內史王珣有別館在武丘山戴逵潛詣之  
與珣游處積旬後珣爲尚書僕射上疏請召逵  
爲國子祭酒逵名益顯

右五

顧辟疆園王獻之入會稽經吳門先不識主人  
值辟疆方集賓友酣燕園中而獻之游歷旣畢  
指麾好惡傍若無人辟疆勃然曰不足齒之僮  
爾使驅其左右出門獻之獨坐輿上展轉顧望  
而僕從不至遂移時蓋獻之之肆辟疆之隘也  
辟疆園唐時猶在顧况嘗假以居郡守贈詩云

辟疆東晉日竹樹有名園年代更多主池塘後裔孫今莫知其所

右六

戴顓宅故傳北禪寺是也顓父達字仲若嘗游吳號吳中高士顓居剡下復游桐廬桐廬僻遠難以養疾乃出居吳下土人共爲築室聚石引水植林開澗少時繁密有若自然三吳將守及郡內衣冠要其同遊野澤堪行便去不爲矯介衆論以此多之

右七

陸龜蒙宅在松江上甫里魯望唐相元方七世

疑園

孫也始居郡中臨頓里晚益遠引深遁居震澤

旁自號甫里先生有地數畝有屋三十楹有田

奇十萬步有牛減四十蹄有耕夫百餘指而田

汗下暑雨一晝夜則與江通色先生由是苦饑

困倉無升斗蓄積乃躬負畚鍤率耕夫以爲具

益遂終焉後以高士召不至李蔚盧攜素與龜

蒙善及當國召拜左拾遺詔方下龜蒙卒其所

居遺基尚存

右八

任晦宅見於皮陸詩有深林曲沼危亭幽砌



任君棄涇縣尉歸居于其間魯望詩云吳之辟  
疆園在昔勝樂敵前聞富脩竹後說紛恠石風  
烟慘無主載祀將六百草色與行人誰能問道  
跡不知清景在盡付任君宅据此殆卽辟疆之

園邪

右九

廣陵王元璩別宅舊與南園相近據九國志云  
元璩治蘇州頗以園池草木為意剏南園東圃  
及諸別第奇卉異木名品千萬今其遺迹多在  
居人之家其崇岡清池茂林珍木或猶有存者

右

范文正公義宅在普濟橋旁宅之建舊矣有西  
齋已百載二松對植扶疎在軒文正公少長於  
此及還吳乃命齋曰歲寒堂松曰君子樹閣曰  
松風閣賦三題以規戒其昆季子弟其後遂置  
宅為義宅使其族屬世世居焉既貴又於其里  
中買常稔之田號曰義田以養濟羣族族之人  
日有食歲有衣嫁娶凶葬皆有贍擇族中長而  
能幹者一人主其計而時其出納焉人日給米

一升歲衣一縑嫁女者錢五十千娶婦者二十千再嫁娶與長幼之葬者皆有差公之令嗣顯於朝雖未歸吳而至今能修其法承其志不墜也故族中之仕者足以養其清族中之不仕者足以助其生蓋自古未有而文正公爲之斯百世之師法也已

文正公詩見  
總集右十一

蘇子美滄浪亭在郡學東子美既以事廢乃南遊吳中一日過郡學東顧草木鬱然崇阜廣水並水得微徑於雜花修竹之間趨數百步有棄

地乃中吳節度孫承祐之池館也均隆勝執遺意尚存子美買地作亭號曰滄浪前竹後水水之陽又竹無窮諸公多爲之賦詩子美嘗謂吳中渚茶野醞足以消憂尊鱸稻蟹足以適口又多高僧隱君子佛廟勝絕家有園林珍花奇石曲池高臺魚鳥留連不覺日暮遂終此不去者焉

右十

程正議宅在南園旁公少而軒闢有才志因過隙地右開元瑞光二寺左南園嘗曰此可以爲宅也及稍顯遂得其地卜居焉太守晏公贈之

詩云衣冠雖盛皆僑奇青瑣仙郎獨我鄉蓋衣冠之居郡固多唯公寔吳人也晏公又名其坊曰畫錦以志焉

右十三

故資政殿學士太子少保元魏公宅在帶城橋東元公嘗參大政引年歸老居於是邦太守章公命其宅曰袞繡坊

右十四

先光祿園在鳳皇鄉集祥里高岡清池喬松壽檜粗有勝致而長文樓隱於此號曰樂園

右十五

冢墓

凡十五節

巫咸墳在平門東北三里巫咸商太戊時賢臣也書曰伊陟贊于巫咸作咸又四篇離騷云巫咸將夕降兮懷椒糝而要之說者以為巫咸古神巫也舊傳有墓於此故書之圖經亦云虞山者巫咸所居然則咸常在吳矣平門又名巫門為此故也吳王壽夢楚之大夫申公巫臣適吳圖經云巫臣冢在將門外非與此同

右一

秦伯墓皇覽云在吳縣北梅里聚去城十里劉昭案無錫縣東皇山有秦伯冢去墓十里有舊

宅其并猶存二說固不同今吳縣無錫界俱有  
梅里之名未知孰是要當訪之耳

右二

仲雍墓太平寰宇記云常熟虞山有仲雍齊女  
冢東是仲雍西是齊女仲雍比德泰伯孔子謂  
虞仲夷逸隱居放言身中清廢中權班固以虞  
仲者仲雍也梁昭明太子作虞山招真治碑云  
遠望仲雍而高墳蕭瑟旁臨齊女則哀隴蒼茫  
蓋梁時猶可見也

右三

女墳湖在吳縣西北六里吳越春秋以謂吳王

小女因王食蒸魚辱之不忍久生乃自殺一說  
夫差小女字幼玉觀父之過憂國之危願與韓  
重者為偶志願不果結怨而死夫差痛思之以  
金棺銅槨葬之閭門外葬已祭之其女化形而  
歌曰南山有鳥北山張羅鳥既高飛羅將奈何  
志欲從君讒言孔多悲怨成疾歿身黃坡竊謂  
此詩亦有深旨殆此女生時所賦邪南山有鳥  
喻越也北山張羅喻制越非其所也鳥既高飛  
勾踐之盛也羅將奈何夫差不可以制越也志

欲從君讒言孔多謂雖欲從父之命奈何其羈  
讒言而忘忠義也彼韓重之怨蒸魚之忿殆恐  
非也墳之爲湖或曰墓所陷也或曰取土爲墳  
鑿而成也 右四

齊女墓在虞山吳太子所娶也齊女憂思發病  
且死謂太子必葬我虞山上倘死而有知猶望  
故國吳王從之孟子謂齊景公旣不能令又不  
受命是絕物也涕出而女於吳卽此也 右五

吳王僚墳在吳縣西十二里岸崆山旁在西下

有思益寺 右六

吳王夫差墓在吳縣西北四十里餘杭山猶亭  
卑猶之位今名陽山者是也地近太湖夫差棲  
於姑蘇山轉戰西北敗于干遂夫差旣伏劔死  
越王令千戈人以一塚土葬之秦餘杭山卑猶  
宰詬亦葬其旁 右七

言偃墓在虞山上與仲雍墓並列 右八

漢梁鴻墓在縣西四里要離墓北後漢書云梁  
鴻字伯鸞扶風平陵人娶同郡孟光字德耀共

至步位皋伯通鴻閉門著書十餘篇疾且困告  
主人曰昔延陵季子葬子於羸博之間慎勿令  
我子持喪歸去及卒伯通葬於吳要離冢旁咸  
曰要離烈士而伯鸞清高可令相近葬畢妻子  
歸扶風唐陸龜蒙云在金昌亭一里續志云今  
闔門南城內有古冢二相傳爲要離梁鴻基金  
昌亭在城內宋書可證 右九

漢豫州刺史孫堅及其妻吳夫人會稽太守策  
三墓並在盤門外三里載唐陸廣微吳地記墓

前有小溝曰陵浜鄉俗稱爲孫王墓按吳書堅  
死於初平三年年三十七策歿於建安五年年  
二十六堅妻吳氏死於建安七年合葬堅墓黃  
龍元年權追尊堅爲武烈皇帝廟曰始祖墓曰  
高陵吳氏爲武烈皇后策爲長沙桓王太元元  
年八月朔大風拔吳高陵松栢石碑蹉跌按晉  
陽秋云惠帝元康中吳令河東謝詢表爲孫氏  
二君墓置守冢五人修護掃除有詔從之其文  
張峻所作今載文選盤門外大冢是也又唐孫

吳郡志云開元十年寔於十四代祖吳武烈  
皇帝陵東南平地續志云魏吳緝立孫堅廟在  
縣東北孫策祠在縣南

右十

張翰葬橫山東五里翰吳人見機而作託意尊  
鱸歸以毀卒可謂高行之士墳雖亡而名宜存  
也

右十一

顧三老墳在婁門外塘北蓋顧綜墳也綜字文  
緯吳人辟有道歷御史大夫尚書令殿上三老  
漢明帝襲三代之禮正月上日踐辟雍嚴設几

杖乞言受誨焉吳丞相雍其裔孫也綜於東漢  
書無傳事見顧況所撰廟庭碑銘云刊石婁門  
德輝不滅碑亡

右十二

史惟則葬吳城下惟則字天問吳人也工八分  
飛白二篆在唐中葉工以八分名家者四人惟  
則與韓擇木蔡有隣李潮也歷集賢翰林學士  
卒

右十三

唐陵王元璿墓在橫山元璿字德輝武肅之子  
文珍之兄也為中吳節度文穆旣襲位元璿求

觀德宮中用家人禮文穆起酌酒爲壽曰先王之位兄宜當之俾小子至是實兄推戴之力元璋俯伏曰王功德高茂先王擇賢而立君臣之分敢忘忠順因相顧感泣酣樂而罷元璋卒子文奉嗣爲中吳節度涉獵經史好賓客飲兼數人常乘白騾披鶴氅泛舟池中遠近聞賓客笑語聲則就飲爲樂卒官亦葬橫山

右十四

范文正公之先墓在天平山下置祠堂於白雲院中每歲清明大合族人以義田之資設盛饌

祭掃至今修之近世諸公葬於郡境者固多知之不詳未悉書也

右十五

碑碣

凡九節

朱氏墓碣在吳縣西穹窿山旁俗傳云買臣之墓非也按舊經云買臣冢在嘉興縣界不在此也墓旁有碑已漫滅其字可讀者云一十六世四百一十九年居下邳自平始三年避地至會昌壬戌凡八百四十二年籍于吳故邳村之名由下邳之來也請序朱氏過江之祖

文孝廉除



郎中舉有道茂才辟大將軍府除長水校尉文闕  
當漢綱既壞天下大紊公側足虺蜴逕逾江文闕

其後大槩敘子孫官爵此蓋唐人追敘朱氏過  
江之祖石字堙泐譜系不傳惜哉又按唐志載

朱氏世系漢司隸校尉禹坐黨錮誅子孫避難  
丹陽丹陽朱氏之祖也蓋丹陽亦有朱氏右一

春申君廟碑史惟則書又嘗書太伯廟碑重玄  
寺額今失之右二

閩門額李陽冰篆今已失之右三

武丘東山碑龍興觀碑皆陸柬之書亡矣右四

包山神景觀林屋洞院碑唐開成三年建石已

殘缺据其所述蓋唐肅宗時有自潤州刺史求

入道者又云乃去權位散祿親知草屨杖藜游

乎山岳至此山於洞之西門造玄壇立室修玄

元真容而石刻斷折莫知其姓名為誰氏其銘

有云毛公唐君前後出處蓋唐君斯人也碑中

亦述周息元之事云止於內殿帝頻見就問以

道憲之門乃獻諫書周毗聖化其文聞可見不

能言知噫高士之節固難得偶一有焉又遠逝  
山澤不與人接其名聞於王公大人者幾希矣  
如此碑所載者既不見於史冊託之金石又復  
磨滅綴拾存之而不得其朝官切惜哉右五  
報恩寺慧敏律師碑銘台州司馬陳諫譔蘇州  
刺史元錫書字刻刊缺碑云遷神建塔于寺之  
西南隅當八隅泉池之上中峯蘭若文缺蓋有  
之下字  
所謂八隅泉池者皮陸集所謂南池者是邪今  
不見其迹右六

天台大德元浩和尚靈塔碑頌太原少尹崔恭  
撰元浩姓秦氏字廣成智者大師之六世孫荆  
谿和尚之法子翰林學士梁肅蘇州刺史田敦  
及崔恭皆受業弟子起塔於虎丘東山南原文具

總集  
右七

畫龍記長洲令廳事北廡有畫龍六僧繇弗興  
之舊度摸之不知何人其工不謝二子也唐李  
紳爲記其事碑刻猶存右八

周元宅住山碑在洞庭山唐華州刺史令狐楚

事心 九二十七節

泰伯三以天下遜延陵季子三以國遜孔子謂泰伯至德民無得而稱焉其於春秋書曰吳子使札來聘於札之葬也題曰嗚呼有吳延陵季子之墓賢之也吳越春秋云古公病將卒令季歷歸國於泰伯而三遜不受蓋孔子稱三遜者著其實也詩云維此王季因心則友美王季之友泰伯是王季嘗歸國於泰伯而泰伯不受不

爲虛言也吳王壽夢有子四人長曰諸樊次曰餘祭次曰餘昧次曰季札季札賢而壽夢欲立之季札辭不可諸樊乃攝事當國已除喪致位季札季札又辭吳人固立焉季札棄其室而耕乃舍之諸樊卒授弟餘祭祭傳以次必致國於季札以稱先王之意餘祭卒弟餘昧立餘昧卒欲授季札又逃去是三遜其國也然泰伯遜而周興季札遜而吳止其所遇則然也其清風大節足以興萬古之善所補豈小哉宜血食於吳

不絕也右一

昔孔子登泰山見吳門有白馬如練此論者傳聞之誤而好奇之過也孔子雖至聖其視聽與人同耳吳魯相去翅數千里安能見白馬如練哉昔王充論衡嘗辨之矣右二

吳王夫差之盛也越王與范蠡入臣隸于吳或曰囚也蓋三年而後得歸越其所以斷大謀成霸業蠡之功居多句踐之滅吳也師還至五湖范蠡辭於王曰君王勉之臣不復入越國矣越

王曰吾將與子分國而處之范蠡對曰君行制臣行意遂乘輕舟以浮於五湖王命金工以良金寫范蠡之狀而朝禮之環會稽三百里以為范蠡地左丘明著國語蓋與蠡同時猶曰莫知其所終極而太史公以謂浮海出齊變姓名自謂鴟夷子皮耕于海畔老居陶號陶朱公嗚呼蠡能霸其君壽其身智哉智哉右三

禦兒者地名也國語曰句踐之地南至於句無北至于禦兒又句踐曰吾用禦兒臨之而俚俗

之言以禦為語曰范蠡獻西子於吳道中生子  
至此而能語又從而為之說曰吳既亡西子從  
范蠡以行杜牧亦云西子下吳邦一舸遂鴟夷  
夫蠡之智足以顯君而保躬必不蹈于污也昔  
武王伐紂誅妲己而高頰請誅張麗華孰謂蠡  
不如高頰乎 右四

吳舊號句吳蓋方俗之辭猶越之為於越也又  
說者曰吳者虞也秦伯於此以虞為志也 右五  
張良七世孫曰睦字選公為後漢蜀郡太守始

居吳郡吳郡張氏皆其後也

右六

褚伯玉字元璩錢塘人也少有隱操遂往剡居  
瀑布山在山三十餘年隔絕人物王僧達為吳  
郡苦禮致之停都信宿纔交數言而退寧朔將  
軍丘珍孫與僧達書曰聞褚先生出居貴館此  
子滅景雲棲不事王侯有年載矣自非折節好  
賢何以致之僧達答書曰褚先生從白雲游舊  
矣近故要其來此冀慰日夜比談討芝桂借訪  
薜蘿若已窺烟液臨滄洲矣昔丘丹答韋應物

詩云還同褚伯玉入館忝州人謂此也 右七

晉顏含以孝友聞自西平縣侯拜侍中除吳郡太守王導問含曰卿今蒞名郡政將何先答曰王師歲動編戶虛耗南北權豪競招游食國弊家豐執事之憂且當徵之勢門使反田桑數年之間欲令戶給人足如其禮樂俟之明宰舍所歷簡而有恩明而能斷然以威御下導嘆曰顏公在事吳人斂手矣未之官復爲侍中 右八

晉何求字子有弟點字子哲嗣 避太祖諱 字子季簡

穆公尚之孫也何氏過江自晉司空充並葬吳西山求除中書郎不拜隱居吳之波若寺足不踰戶人罕見其面後隱武丘山齊永明四年拜太中大夫不就卒點不入城府性率到好狎人物遨遊人間不簪不帶以人地並高無所與屈大言箕踞公卿禮下之或乘柴車草屨恣心所適致醉而歸累召中書侍郎太子中庶子不就點少時嘗病渴利後在吳中石佛寺建講於講所晝寢夢一道人形貌非常授丸一掬夢中服

之自此而差梁武帝與點有舊賜以鹿皮巾并  
召之點以巾褐引入華林園帝贈詩酒仍詔拜  
侍中辭疾不起子季以會稽山多靈異往遊焉  
居若邪山雲門寺初子季二兄求點並棲遁求  
先季至是子季又隱世以點為大山子季為小  
山亦號曰東山兄弟又謂點為孝隱子季為小  
隱世號何氏三高子季年七十餘乃移還吳居  
武丘山西寺講經論東境守宰經塗者莫不畢  
至梁武帝詔為特進不起給白衣尚書祿固辭

不受卒年八十六 右九

陸慧曉字叔明張融字思光皆吳人也慧曉清  
介正立不雜交游時人以為江東裴樂也融弱  
冠有名行已卓越慧曉與融並宅其間有池池  
上有二株楊柳何點嘆曰此池便是醴泉此木  
便是交讓武陵王曄守會稽以慧曉為征虜功  
曹與府參軍劉璣同從述職璣清介士也行至  
吳謂人曰吾聞張融與慧曉並宅其間有水必  
有異味故命駕往酌而飲之曰飲此水則鄙吝

之萌盡矣慧曉爲南兖州刺史融爲司徒左長  
史卒舊傳有交讓瀆與乘魚橋相近蓋因張陸  
得名也 右十

江左時三吳舊有鄉射禮羊玄保爲吳郡嘗行  
之後久不復修蔡興宗爲會稽太守行之禮儀  
甚整 右十一

南史稱汝南周洽歷吳令廉約無私卒於都水  
使者無以殯斂吏人爲買棺器傅翹亦有能名  
爲吳令別建康令孫廉庶因問曰聞丈人發姦

捕伏惠化如神何以至此答曰無他也唯勤  
清清則憲綱自行勤則事無不理憲綱自行則  
吏不能欺事自理則物無凝滯欲不理得乎  
位至驃騎諮議 右十二

虎丘有清遠道士同沈恭子遊寺詩幽獨君詩  
清遠道士所稱自商周至秦漢末以鬼神自讚  
顏魯公愛之遂刻于巖際并有繼作李衛公又  
從而和之幽獨君詩大曆中於劍池石壁隱出  
觀察使李道昌以聞于朝代宗敕道昌祭之此



亦甚異也

右十三

張長史吳縣人也爲人個儻闊達卓爾不群所遊者皆一時豪傑其草書入神品初爲常熟尉有老叟陳牒旣判去不數日復來長史怒而責之曰汝何以細故屢擾吾官府也叟曰觀君筆迹奇妙欲以藏篋筭耳非有所論也因問所藏盡出其父書長史視之曰天下奇書也自此益盡其法性嗜酒每大醉呼呌狂走下筆愈奇嘗以頭瀉墨而書旣醒視之自以爲神不可復得

也世以此呼張顛後爲金吾長史

右十四

韋應物正元初爲蘇州刺史是時房復瀉爲杭州刺史皆豪人也韋嗜詩房嗜酒其風流雅韻播於吳中或目韋房爲詩酒仙韋立性高潔鮮食寡欲所在焚香掃地而坐唐人賢而慕之不敢名皆曰韋蘇州云

右十五

杜牧詩云我愛朱處士三吳居中央罷亞百頃稻西風吹半黃又云我昔造其室羽儀鸞鶴翔交橫碧流上竹映琴書床出俗無近語堯舜禹

武湯觀此詩知處士之賢也然莫知其名而他書亦無所見惜哉

右十六

圖經每歲有丁身錢自大中祥符四年詔以兩浙福建路荆湖南北廣南東路在偽國日出丁身錢竝特除放凡歲免緡錢四十五萬有餘貫由是蘇民至今無計口筭緡之事蒙澤最厚

右十七

謝賓客濤字濟之既冠居吳中會汾晉平郡國當表賀吳士爲奏者文體弱更數人皆不能如

郡將意謝公私草之爲人持去郡將大稱愜吳中先生亦自愧不及故王黃州羅拾遺處約並爲吳之屬縣長謝公與之游羅嘗與王書云濟之揚摧天人蓋吾曹之敵其爲名流推重如此

右十八

王黃州禹偁字元之嘗爲長洲宰其風流篇什播於一時由此遂拜拾遺故其詩云吳門吏隱過三年何事陶潛捧詔還步武已趨龍尾道夢魂猶憶虎丘山今虎丘至今有畫像存焉他詩

皆具總集

右十九

丁晉公吳人大中祥符中叅豫大政八年出爲平江節度使知昇州擁節旄還本鎮過鄉拜墓搢紳榮之吳人自陸宣公後至公爲宰相歸葬于華山習嘉原

右二十

兩浙轉運使治所初在吳郡孫何漢公自京東遷二浙實居于此作三亭一曰目公於此退處也二曰溫故於此閱書也三曰臈舟於此繫舟以備巡按也有三亭記見集中

右二十一

始蘇刺史有若范文正公富監皆牧鄉郡葉少列先典州旣而請老其子道卿以本路漕節來侍其孫公秉熙寧中又爲郡守蔣希魯再牧是邦遂歸休於此盛文肅胡武平趙叔平後至政府皆盛事也

右二十二

平江節度推官解舍昔甚隘陋天聖中武寧章岷伯鎮居幕府始廣而新之伯鎮時名籍甚初登第翰林諸公賦詩贈行其解舍記并記刻猶存當是時盛翰林度黃工部宗旦守郡多以事

委伯鎮而伯鎮之弟伯瞻及今太守朝議公同侍親居此士大夫多稱之伯瞻後至太常少卿按漕廣東云 右二十三

章太守嘗言伯鎮之在幕也盛文肅公委之遍閱經史凡言吳事者錄爲一書其書在盛氏人不復見之惜哉 右二十四

許洞以文辭稱於吳尤邃左氏春秋嗜酒嘗從酒家貸飲一日大寫壁作歌數百言鄉人競來觀之售數倍乃盡捐其所負 右二十五

陳氏有兩高士曰郢曰之奇郢不聞其字范文正公以先生稱之錢氏歸朝也郢有兄七人皆仕宦而獨隱居里中以琴書自樂好佛老晚不茹葷者十五載丁晉公其甥也欲薦以官郢拒之晉公以詩誦美嗚呼可不謂高士哉之奇字虞卿謝隴西郡王宅教授以歸十八年而終嘗有詔起之不行也持身謹嚴而外簡曠不爲矯刻之行衣冠者舊置酒相過從虞卿遇輒往未嘗視其人以爲高下鄉人愛之逢於道者必

肅容起恭相語曰此吾陳君子也孝友愷悌調  
贍宗族雖貧而竭力吳人言家行者必推虞卿  
其葬也今丞相王公爲之銘號曰陳君子云右  
十六

元豐四年資政殿學士太子少保元魏公絳正

議大夫集賢殿修撰程公師孟相繼請老居吳

中二公交契最密又同還里第時太守朝議章

公岷亦平昔僚舊於是良辰美景往來置酒以

相娛樂又嘗盛集諸老以繼會昌洛中之宴作

新詞以歌焉右二十七

雜錄 凡十五節

吳都賦云鄉貢八蠶之綿蘇州舊貢絲葛絲綿  
八蠶絲緋綾布白角簾草席鞵大小香杭柑橘  
藕緇皮鮓鰕鴨胞肚魚魚子白石脂蛇粟皆具

唐志右一

大業中吳郡送扶芳二百本敕西苑種之其木  
蔓生纏他木葉圓而厚凌冬不凋夏月取葉微  
炙之以爲飲色碧而香美令人不渴有壽禪師

妙醫術以扶芳葉爲青飲入獻菘菜裹二百斤其菜生於菘蔣之下形如細菌色黃赤如金梗葉鮮嫩和魚肉甚美七八月生薄塩裹之入獻

右二

大業中吳郡送太湖白魚種子敕苑內海中以草把別遷著水邊十餘日卽生小魚其取魚子以夏至前三五日白魚之大者日晚集湖邊淺水中有菘蔣處產子綴著草上是時漁人以網罟取魚然至二更則產竟散歸深水乃刈取菘

蔣草有魚子者曝乾爲把運送東都至唐時東都猶有白魚

右三

大業中吳郡所獻有海鯪魚乾膾四瓶浸一瓶可得徑尺面盤十盤帝以示羣臣云昔術人介象於殿廷釣得此魚此幻化耳亦何足珍今日之鱠乃是東海真魚所作來自數千里亦是一時奇味虞世基云術人旣幻其膾固亦不真出數盤以賜達官海魚肉軟而不腥雖已經久乾以法修之可食也又海蝦子四十挺色如赤瑠

瑤光徹而肥美勝鱸子數倍又獻鮓魚含肚干  
頭極精好愈於石首含肚也松江鱸魚乾鱸六  
瓶瓶容一斗取香柔花葉相間細切和膾撥令  
調勻鱸魚肉白如雪不腥所謂金齏玉膾東南  
之佳味也紫花碧葉間以素膾鮮潔可愛蜜蟹  
二十頭擁劍四甕擁劍似蟹而小一螯偏大吳  
都賦所謂烏賊擁劍也鯉腴鯪四十瓶肥美冠  
於鱸鮪乾膾之類作之皆有法時有口味使杜  
齊濟會稽人別味善于鹽梅然暴殄海物以縱

口腹之欲卒至於亡國茲可以爲戒也 右四

大業中楊玄感反吳人朱燮晉陵人管崇起江  
南應之兵十餘萬隋將討之不能克帝遣江都  
贛治王世充發淮南兵三萬討平之初世充渡  
江三戰皆捷至毘陵開城以迎卽日進軍賊據  
潘封柵斷路世充運薪數萬圍逼柵縱火焚之  
賊潰死者十四五餘衆保無錫世充又拔之賊  
守白方柵世充軍至出柵而迎世充並許其首  
不罪追吳人魁帥先降者數十人於通玄寺瑞

像前燃香誓不誅殺吳人聞之一旬之間歸者  
略盡世充食言貪其子女財貨坑降者八千人  
於黃山下獲貲巨萬選美女八十餘人將還進  
之帝並以賜世充世充將至家其妻盧氏見之  
憤惋即日卒武德之際世充遂至殲夷負誓殺  
降不祥之極

右五

蘇之東禪院古佛像容貌端麗頂珠圍徑數寸  
乾符甲午歲忽有毫光紅黃青紫於是士庶觀  
瞻檀施山積後三日有老所由惑其事固請梯

升卽佛光焰而窺之乃見佛之首有一穴捫之  
有二白鼠長可尺餘自穴躍出綠光焰入藻井  
斯人遂探得碎幡數片以紅幡映頂珠卽紅光  
出青黃紫亦然人皆歎息而去鹿門子曰佛金  
仙也而白鼠之禍作光於頂得非金氣盛乎是  
後金革遂興

右六

中和二年僖宗狩蜀潤帥周寶以子壻楊茂實  
爲蘇州刺史溺於妖巫作火妖廟于子城之南  
鬻祭以牲牢外用炭百餘筋燃于廟庭自是吳



中兵火荐作亦被髮伊川之先兆歟 右七

光啟初董昌知杭州軍事浙西周寶懼其強乃用徐約為蘇州刺史以禦之約至未逾年建九江王廟殿堂屋壁塑神龍蛟螭繪畫雲雷波濤之狀自是姑蘇連大水民幾不粒食者三載傳云妖由人興變不自作其斯之謂乎 右八

洞庭山出美茶舊入為貢茶經云長洲縣生洞庭山者與金州蘄州味同近年山僧尤善製名謂之水月茶以院為名也頗為吳人所貴 右九

張又新品天下之水其二慧山泉三虎丘井六松江陸魯望好之高僧逸人時致以助松江水或以謂第四橋者最佳蓋差遠井邑宜更清耳以江水醞酒特佳於他處昔人重若下酒亦以溪水為美耳 右十

唐世蘇州進藕最佳者名傷荷藕或曰葉甘為蟲所傷或曰故傷其葉以長根又多重臺蓮花花上復生一花亦異也 右十一

唐時重玄寺閣一角忽墊計數千緡方可扶薦

一匠云不足勞人請得一夫作楔可正也主寺

者從之僧食訖輒持楔數片登高敲闢未逾月

閣柱悉正

右十二

吳縣有利娃鄉吳人以美女爲娃蓋宜爲麗娃

右十三

圖經吳縣境有定山粟山者殆編錄之誤也按  
謝靈運詩云朝發漁浦南暮宿富春郭定山杳  
雲霧赤亭無淹泊者乃浙江中粟山有飛泉石  
杵吳先主刻題者在錢塘縣西

右十四

吳江舊有如歸亭俯視江湖爲天下絕景處昔  
人題咏最多慶曆中知縣事張先益修飾之蔡  
君謨爲記其事熙寧中林郎中肇出宰又於如  
歸之側作鱸鄉亭以陳文惠有秋風斜日鱸魚  
鄉之句也亭旁畫范蠡張翰陸龜蒙像謂之三  
高好事者爲美

右十五

吳郡圖經續記卷下

晉吳郡圖經續記後

昔揚子雲嘗有言仲尼多愛愛義也子長多愛  
愛奇也予嘗患之今記述類多博收汎採譬猶  
廣塵大肆百物羣品雜然陳列於前而無所別  
異此記述者之公患也辭曹朱伯原少以文學  
第進士退居吳郡博覽載籍多所見聞因爲圖  
經續記以補闕遺觀其論戶口則繼之以教陳  
風俗則終之以節至於辯幼玉之怨正語兒之  
妄紀譚生之譏其論議深切著明皆要之禮義

與夫牧守之賢人物之美事爲之善凡前言往  
行有足稱者莫不褒嘉歎異重復演說信乎所  
謂君子於言無苟者予每至伯原隱居愛其林  
圃臺沼逍遙自樂及得斯記觀之然後又愛其  
趣識志尙灑然有異於人使逢辰彙征則其所  
摠發豈易量哉惜其遺逸沉晦而獨見於斯記  
故爲書其后以待知伯原者元祐元年四月十  
五日臨邛常安民書

圖經續記後序

余家自伯父皇考洎諸父奉王大母大母來居  
于蘇著籍此州者五十年矣今帶城橋儒學坊  
爲吾家榜也橫山之寶華華山之博士塢吾家  
三世之所葬也余雖少長于蘇而山川城邑津  
梁園觀往往未知其所由來嘗以問

樂圃先生先生出所爲圖經續記以示我曰此  
一覽盡之矣退而觀之歎千百載之廢興千數  
百里之風土燦然如指諸掌嗚呼何其備哉先

生之書三卷若干條而所包括者古今圖籍不可勝數雖浮圖方士之書小說俚諺之言可以證古而傳久者亦畢取而並錄先生豈欲矜淹博而耀華藻哉舉昔時牧守之賢異來者之相承也道前世人物之盛異后生之自力也溝瀆條浚水之方倉庾記裕民之術論風俗之習尙夸戶口之蕃息遂及於教化禮樂之大務於是見先生之志素在於天下也豈可徒以方域輿地之書視之哉先生未冠而擢第英聲振士林

達

林不幸以未疾臥家不得建其志於斯民然而潛心古道篤意著述其所撰次成秩如是書者非一嘗探測其淵源而妄論其規制以謂黃鐘大呂不足以比其清陽阿激楚不足以方其妙齊紈蜀錦不足以埒其華崑玉南金不足以儷其美長江巨河不足以況其遠輕車駿馬不足以侔其逸意者左丘非失明國語不成虞卿非窮困陽秋不作一何發揮之妍麗也不然天將激先生以鳴斯文是以固陋之耶雖然先生

之疾損矣無害其可以亨舉於天衢也昔者劉向非大發天祿石渠之藏不能盡論分野之風物賈耽非博詢遐陬絕域之衆不能悉知華夷之道里先生之才不歉於二子特處非其所而已與其陳四境之形勝孰若使志四海之封畿與其論千里之事物孰若使綜萬方之利害況史觀經始品藻才難當筆削之任者非先生而誰可哉伏讀終篇感先生之未遇輒書卷末庶幾萬一有倣於

朝廷今日當爲官而擇人者元祐七年十二月朔大雲編戶林處序

圖經續記後序

祕書省正字樞密院編修朱公伯原嘗爲前太守晏公作吳郡圖經續記三卷旣成而晏公罷去遂藏于家其後太守章公雖求其本以寘郡府而見之者尚鮮也元符改元安上以不才濫縮倅符到郡之後周覽城邑顧瞻山川竊欲究古興替盛衰之迹而舊經事簡文繁考證多闕方欲博訪舊聞稍加增綴而得此書於公之子耜讀之終卷惜其可傳而未傳也於是不敢自

祕偶以承乏郡事俾鏤版于公庫以示久遠若  
乃著述之本意則詳於自序而摠辭之博瞻措  
意之深遠則又詳於常林二君之後序矣茲不  
重見姑誌其刊鏤之歲月云越明年歲在庚辰  
八月望日朝請郎通判蘇州權管 軍州事祝  
安上書

自庚辰八月權州祝君鏤版題跋之後距今紹  
興甲寅寔三十五年佑被

命假守時兵之餘圖籍散亾秉筆凝滯觸事面  
牆每賢士大夫相過必以諮訪未幾前湖州通  
判陳能千自青龍泛舟携此書相訪開卷欣躍  
因授學官孫衛補葺校勘復爲成書以傳異日  
臧方氏續修

中興新書當亦有取於斯則

樂圖先生之志不泯矣紹興四年六月初十日



漣水孫佑書

薦朱長文劄子

元祐元年六月二十五日朝奉郎中書舍人蘇軾同鄧溫伯胡宗愈孫覺范百祿等劄子奏臣等伏見前許州司戶叅軍蘇州居住朱長文經明行脩嘉祐四年乙科登第墮馬傷足隱居不仕僅三十年不以勢利動其心不以窮約易其介安貧樂道闔門著書孝友之誠風動閭里廉高之行著于東南本路監司本州長吏前後累奏稱其士行經術乞朝廷旌擢差充蘇州州

學教授未蒙施行近奉 詔中外臣僚自監察御史已上並舉堪充內外學官二人此實 朝廷博求人才廣育士類之意如長文者誠不可多得其人行年五十餘昔若足疾今亦能履臣等欲望 聖慈裒難進之節收久廢之材量能而使之特賜就差充蘇州州學教授非惟祿餼賜養一鄉之善士實使道義模範彼州之秀民取進止

貼黃伏乞特賜檢會新除楚州州學教授徐積體例施行

嘉靖戊申三月借杉瀆橋沈辯之本鈔完藏于懸壘室至己巳九月又借崑山葉舉人子寅宋刻本較對差字錢穀記

大明萬曆二年歲次甲戌六月朔旦  
郡理泰和龍公宗武捐俸繡梓版  
留長洲錢氏懸齋室